

## *ASO LUA, 28 SETEMA 2021*

*Na nofoia e le Fofoga Fetalai le Nofoa i le itula 9:31 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga a le Fono aoao Faitulafono.

Ou te faatalofa atu i lenei taeao fou i le paia o le Palemene. I le afio o lau Afioga i le Palemia, Lau Afioga i le Sui Palemia. Afioga i Minisita o le Kapeneta, ma le afio o Minisita Lagolago.

E tainane lea Itu o le Maota i le afio o lau Afioga i le Taitai o le Itu Agai, lau Afioga i le Sui Taitai ma le mamalu o sui usufono uma o le Palemene. Malo le soifua manuia ma le lagi e mama.

E faafetai i le Atua ua mafai ona tatou fesilafai i lenei taeao, i le faaauauina o le tatou galuega.

E faatalofa atu foi i le tapuaiga a Le Ao o le Malo ma le Masiofo. Le afioga i le Sui o le Fono o Sui Tofia, Faamasino Sili ma le mamalu o le Faamasinoga.

E faapea foi le nofo a Faauluuluga o Ekalesia Kerisiano ma le paia o le Afaigaluega totofi o le Talalelei.

E faatalofa atu foi i le tapuaiga a Samoa, o paia i Aiga ma a latou Tama, o Tama ma Aiga, le usoga a Tumua ma Pule, Ituau ma Alataua, Aiga i le tai ma le Vaa o Fonoti.

Ua faamalo folau, manuia le soifua manuia ma le lagi e mama. Ia tapuaia maia ma le manuia.

Ou te faatalofa atu foi i Ofisa Sili o Pulega o Matagaluega ma Faalapotopotoga Tumaoti o lo tatou Malo ua mafai ona tatou mafuta i lenei taeao. Manuia le alofaiva o le Palemene i lenei taeao.

### **ISI FAASILASILAGA A LE FOFOGA FETALAI**

**FOFOGA FETALAI:** Mo le silafia manino e le Palemene, o le tiute lava o le Nofoa o le faamanatu atu i sui mamalu uma le tulaga sagatonu o le tatou galuega. Aemaise o le tausiga o tulaga mamalu ma le aloaia o lenei Fono Aoao Faitulafono.

Ua molimauina e le Nofoa i ala o faasalalauga, ni uiga faamuamu o le Itu Agai i le faagasologa o le talanoaina o le Tala o le tupe, na paia i le Aso Lulu na se i mavae atu nei.

Ua oo lava i le Taitai o le Itu Agai ua ia faasalalauina faalauaitele faapea, e le i fia fesili i le Tala o le Tupe, ae na mafua ona fesili, ona o le ula i le vaivai tele.

Ua ou manatu, ua tatau ona oo i ai se upu a le Nofoa. E ui o fafo atu o le Maota lenesi na lafo ai nei saunoaga, peitai ua faaoga felafolafoaiga aloaia a le Maota e faamasinoina ai le aano o lafoga sa fai.

E ao ona ou puipui i le taualoa o le Palemene o le atunuu. Le paia e o le Palemene, e le tau omai le atunuu e faamamalu le Palemene, o tatou lava e mamalu ai le Palemene. O tatou tu ma aga ma faatinoga tatou te sufi ma faatino. E taualoa ai o tatou tofiga taualoa.

O ia ituaiga lafoga ua atagia ai le le faaaloalo, ma le le amanaia o lea Itu o le tatou Maota. E le gata o le paia i Pulega Faatonu, ae o sui mamalu o isi itumalo o le atunuu na filifili mai e o latou itumalo.

Sa ou tolaulauina i la outou tautoga ia Tulafono laiti o amio taualoa a le Palemene. E aofia ai i le tatau i so o se sui usufono o lenesi Palemene, ona faaaloalo i isi foi sui usufono ma tagata lautele.

Sa lagona lava le loto faafetai i lea po na Iloilo Auilili ai le Tala o le Tupe, ona o le tofa faatoeaina a le Taitai o le Itu Agai.

Aepeitai o faasalalauga ua ou molimauina, o ni aga faaamuamu ma ua ou lagona ai lava le faanoanoa, o au o le Fofoga Fetai, i le le amanaia e le Taitai o le Itu Agai o Taulumaga mamalu a le Palemene.

Ua taoto a tatou upu ma tala i mea sa o tatou feeseeseai ai, ma ua faaleo lo tatou loto fefaamagaloai. Peitai ua toe vaemanua i le faafitauli ua tulai mai.

E mafua ona mamafa i le Nofoa, leaga o uiga ia e le maua ai so tatou filemu. E tatou te iloa uma faiga ma gagana e faatino ai le faiva faa-Itu Agai. Ae a tatou o i lafoga ua faasalalau, e le malu ai le maopoopoga ma le taualoa o le Palemene.

E le tuufauina foi e le Nofoa. Ua ou lapataia le paia o le Palemene, e le tatau ona toe tulai mai ni faiga faapea. E leaga e tau faatauvaaina ai le aloaia o le Palemene. E saoloto lava le faaaliga o finagalo i totonu o le Maota lenesi, o tulaga aloaia ia.

A ia o tatou aloaloese mai aga e atagia mai ai, ai o ni uiga masani po o amioga masani ia a le Palemene, ma ona sui usufono.

O le Maota lenesi, e pae i le tofa ma le utaga fetuutuunai. O tofa foi ma le utaga e faamoemoe i ai le atinaega o le tamaoiaiga o Samoa.

O a foi a tatou felafolafoaiga, ou te talitonu ia taoto lava ma teumalu i totonu o le Maota lenesi suaga o le vaatele i finagalo fefulisai, ma felafolai mo se manuia o le atunuu.

E le o se mea ula le Palemene lenesi tulou le gagana. E le aloaia lea mea o le saunoa i inei, ae tatou o atu faasalalau o ni mea ula. Ma taufaifai ai ma faaamuamu i le aloaia o le Fonousu ma soalaupulega, sa fai i tulaga aloaia. E le o se faataitaiga lelei lea mo le Palemene o Samoa i le agai atu i le lumanai. Aemaise o le taulamua ai o le sui usufono ua leva i le Maota lenesi.

Ou te toe faapea atu, “Ua ou fautuaina le paia o le Palemene, e le tatau ona toe tulai mai lenei faafitauli. Ia tatou galulue faatasi, e tausia le aloaia ma le taualoa o lenei Palemene aemaise o tatou Tulafono Tumau.”

**TULAFONO TAU FAAOFI O TEUTEUGA O LE TULAFONO O FAIGA PALOTA (NU 2) 2021 - faitauga muamua.**

**FOFOGA FETALAI:** E tapa le Afioga i le Minisita mo Faiga Palota,

**Afioga Hon FAUALO HARRY JEFFREY SCHUSTER (Minisita o le Komisi o Faiga Palota):** E faafetai i lau Afioga i le Fofoga Fetalai mo le avanoa.

E tulai atu ma le ava tele ma le faaaloalo. Ou te faatu le lafo, *Ina ia faitauina nei le Tulafono Tau Faaofi o Teuteuga o Faiga Palota (Nu 2) 2021 i lona faitauga muamua.*

*Faaluaina e le Minisita mo Faatoaga & Faigafaiva ma le Minisita mo le Soifua Maloloina.*

*Na faamaonia le lafo ma faitauina ai le Tulafono Tau Faaofi o Teuteuga o le Tulafono o Faiga Palota (Nu.2) i lona faitauga muamua.*

**TULAFONO TAU FAAOFI O TEUTEUGA O LE TULAFONO O FAIGA PALOTA (NU 2) 2021 – faitauga faalua.**

**FOFOGA FETALAI:** Talu ai ua ou taulimaina le faaaliga o le tulaga faanatinati, ua maea ona sainia e le Taitai o le Maota.

O lea o le a sagai atu loa le Fono Aoa, mo le faitauga faalua o le Tulafono Tau Faaofi o Teuteuga o le Tulafono o Faiga Palota (Nu 2) 2021 ma faagasolo ai lava seia faitauina faatolu.

Ou te tapa lau Afioga i le Minisita o Faiga Palota.

**Afioga Hon FAUALO HARRY JEFFREY SCHUSTER:** Lau Afioga i le Fofoga Fetalai, ou te faatu le lafo, *Ina faitauina nei le Tulafono Tau Faaofi o Teuteuga o le Tulafono o Faiga Palota (Nu 2) 2021 i lona faitauga faalua. Ma ou te fia tautala faamalamalama i ai.*

*Faaluaina e le Minisita mo Faatoaga ma Faigafaiva ma le Minisita mo le Soifua Maloloina.*

**FOFOGA FETALAI:** O le avanoa lenei i lau Afioga i le Minisita e te saunoa faamalamalama ai i le Tulafono.

**Afioga Hon FAUALO HARRY JEFFREY SCHUSTER:** E faafetai tele lau Afioga i le Fofoga Fetalai, mo le avanoa. A soofua le pua ma le laulaau ona faataualofa lea o le matagi ma le sua na ala mai i le sulu. Ou te le faatali i le uta a le ofe ma le uta a le solo. E leaga ua faa-Maota aumai i le papa e pei o le upu e fai i gataifale o Lilomaiava. Ua tea atu foi atu foi le asuasuvale na i le vasa, topule Tagaloa matua, aua e faigata faiva ia ua laulausasa. O lea foi ua sagisagi faamanuao le paia o le aso. Aua o lea ua manutae le Maota Fono Aoa Fautulafono o Samoa. O lea foi ua silasaaga lupe o le taeao, aua e faigata le tapuaiga a Aiga ma a latou Tama, o Tama foi ma o latou Aiga, usoga a Tumua ma Pule, Ituau ma Alataua, Aiga i le tai ma le Vaa o Fonoti.

Tulouna le afio a le Ao Mamalu o le Malo ma lau masiofo. Sui o le Fono o Sui Tofia ma lou faletua.

Tulouna foi lau afioga i le Palemia ma le sui Palemia ma le mamalu o le Kapeneta.

Tulouna foi le Taitai o le Itu Agai ma le sui Taitai o le Itu Agai, tulouna lau afioga i le Fofoga Fetalai, ma le mamalu o sui filifilia o le Palemene.

E faatalofa atu foi i le Afioga i le Faamasino Sili o faamasinoga, le Faamasinoga maualuga faapea le Faamasinoga faaitumalo. Ae tainane le Peresetene o Fanua ma Suafa, aemaise alii ma tamaitai faamasino o faamasinoga uma a Samoa.

E faatalofa atu foi i le tapuaiga mamana a le aufailotu a lo tatou atunuu, o lo o faanonomanu aua se manuia mo Samoa.

E le faagaloina foi le tapuaiga a o tatou uso mai le motu i Sasae, le paia lea i le Faleagafulu, Sua ma le Vaifanua, Fofu ma Itulagi, Saole ma Saleaamua ma le Launiu na Saelua, Faatuiolomotu, Tootoo o le Faleula ma upu ia te oe le Manuatele.

Ou te faatalofa atu i le mamalu o Ofisa Sili o Pulega o Matagaluega ma Faalapotopotoga a le Malo, malo le galulue.

Lau Afioga i le Fofoga Fetalai, o paia ia o si o tatou atunuu ou te fia faatulou atu i ai.

Ae o le a fana tonu le malama ma vilitonu le mata i le faamoemoe e faatatau i le Tulafono Tau Faaofi, e teuteu ai le Tulafono o Faiga Palota Nu 2, 2021, lea ua taatia nei i luma o le malae, mo le iloiloina e sui usufono uma o lo tatou atunuu.

Lau Afioga a le Fofoga Fetalai, o leni Tulafono e le se tulafono tele tele, e le tele foi ni suiga. E taua suiga mo le faatinoina o galuega a le Komesina o Faiga Palota ma le Matagaluega faapea foi le toe faagatusa o aiaiga na i ai i le agavaa o sui tauva mo le Faiga Palota, na o tatou tauva ai i le aso 9 Aperila 2021. Ma aiaiga foi mo sui tauva mo le palota laititi lea tatou te agai atu i ai e 7, na mafua mai i faaiuga a le faamasinoga.

O le Fuaiupu 1, ua aiaia ai le Igoa Puupu ma le Amataga o le Tulafono.

O le Fuaiupu 2, ua teuteuina ai le fuaiupu 2, o le Tulafono autu i lalo o le faauigaina o le aso e faatoai atu ai, le suafa o se sui tauva mo le faiga palota tele. O lenei suiga ua aofia ai ma le vaega 149 1A o le faauigaina o le Tulafono, ia ogatusa ai le faatinoina o le faiga palota lautele ma le faiga palota laititi e mafua mai i se faiga palota lautele, po o se isi lava faiga palota laititi.

O le Fuaiupu 3, teuteuina le Fuaiupu 8 o le Tulafono autu. E pei ona faatulagaina i lalo. (a). teuteuina le faafuaiupu (1) parakalafa (c), i le suia o upu suafa matai, ua lesitalaina mo le 3 tausaga sosoo e faauigaina i le aso e faatoai atu ai. O le suiga o le a i ai, lesitalaina le suafa matai, ae le i oo i le aso e faatoai atu ai. O lenei suiga, e aiaia ai le taimi e lesitalaina ai se suafa matai o se tagata o lo o faamoemoe e avea ma sui tauva o le faiga palota laititi.

O le taimi lenei, e tatau ona 3 tausaga o lesitalaina lou suafa matai, mai le aso e faauluina ai lou igoa e avea ma sui tauva o se faiga palota laititi.

O le suiga lea o le a i ai nei, e na o le pau le manaoga o le Tulafono, ia lesitalaina lou suafa matai. E le aafia i le suiga lenei le monotaga a le sui tauva, e tatau lava ona atoa le 3 tausaga o faatinoina lau monotaga. Ma taliaina foi e le alalafaga po o le itumalo e te sau ai, ia tulaga masani. Ua i ai le saofai ma ua amanaia e le afioaga. E le i lalo ifo o le 3 tausaga sosoo.

Ua teuteuina foi le parakalafa (d), o le faafuaiupu (1), ia aiaiga e aloaia ai manaoga o le monotaga. E agavaa ai so o se sui tauva, pe afai na faia i totonu o so o se taimi e 3 tausaga sosoo ae le i oo i le aso e faatoai atu ai mo le faamoemoe mo le faiga palota.

O nei teuteuga e foia ai mataupu na aliae mai i taimi o finauga o tulaga agavaa o se sui tauva, mo le palota tele o le 2021. E faatasi ai ma faaiuga a le Faamasinoga i mataupu lea a Sua ma le Komesina o faiga palota o le 27 Novema 2020, ma Tuimauga ma le Komesina o faiga palota 27 Novema 2020. O nei teuteuga e faamanino atili ai le faatinoga o faamaoniaga o manaoga o le monotaga. Ua teuteuina le faafuaiupu (2) (b), i le faaofiina o se parakarafa fou, (iii), e aiaia ai se isi vaega o tagata, e mafai ona faamaonia monotaga a se sui tauva. E ala lea i se tautinoga faaletulafono, e faamalieina ai le manaoga o le monotaga, e tusa ai ma le faafuaiupu (1)(d).

O lenei vaega lona tolu o tagata, o se faaopoopoga lea i Sui o nuu ma Sui tamaitai o nuu, o i ai i lenei taimi.

(c). Ua teuteuina le faafuaiupu (5) ia aofia ai tautua faale-lotu, i le faauigaina o le monotaga. O lenei teuteuga e faamautinoa ai, e aofia i le monotaga faale-lotu, i le faatinoina i se faalapotopotoga faale-lotu, ua maea ona lesitalaina i lalo o le Tulafono mo le 3 tausaga sosoo, e ogatusa foi ma manaoga faale-tulafono mo le monotaga faale-aganuu.

(d). Ia faaofi se faafuaiupu fou (8) e faatagaina ai le Komesina se tagata, e tolu ai le vasega o tagata. E mafai ai ona faia se tautinoga faaletulafono mo le faamaoniga o le manaoga o le monotaga a le sui

tauva. O lenei faafuaiupu e aiaia mai ai, e faatoa mafai ona tofiaina lenei tagata, pe a fai ua le mafai pe musu foi se matai po o se sui o le nuu, po o se sui tamaitai o le nuu e faamaonia le monotaga a se sui tauva, i le faia lea o le tautinoga faale-tulafono.

O lenei foi aiaiga, e fai ma taiala i le komesina mo le faia lea o se tofiga. O le taiala o le faamautinoaina ai, o le tagata ua tofiaina, e mafai ona tuuina mai se faamaoniga, o le monotaga a se sui tauva, e pei ona tuuina mai i le faafuaiupu(1)(d). Ma o lea tagata ua tofia, o lo o nofo i le saofaiga a le nuu e tasi, po o lo o ia umia se tofiga o le ekalesia e tasi, po o se faalapotopotoga faale-lotu o lo o auai le sui tauva i totonu o le nuu po o le itumalo, o lo o fuafua e le sui tauva mai ai.

O le Fuaiupu 4. Ua teuteuina le fuaiupu 53 o le Tulafono autu, i le faaofiina o se faafuaiupu fou (5), e faamautinoa ai, o se sui tauva na te finauina le faaiuga a le Komesina e talia ma teena le filifiliga o se sui tauva e ala i se talosaga i le faamasinoga. Ma ua manuia lana talosaga, e le mafai ona ia faauina i tua le avea o ia ma sui tauva o le palota. Seivagana ua ogaoga se gasegase o se sui tauva, ma ua avea ma tulaga ua le mafai ona faaauuina le avea ai o ia ma sui tauva o le palota.

O le Fuaiupu 5. Ua teuteuina le fuaiupu 54 o le tulafono ina ia faatagaina ai fale palota faapitoa i le taimi o se palota po o se palota lautele po o se palota laititi. E faatulagaina i totonu po o fafo atu o se itumalo. O lenei teuteuga e toe faaaoga ai se aiaiga sa tuuina mai e le Tulafono o Faiga Palota 1963, ua soloia nei. O lea na faataga ai ona faatinoina se palota mo se itumalo, i totonu e na o totonu o le itumalo. O lenei teuteuga e faafaigofie ai ona auai atu tagata palota i fale palota, aemaise ai, pe mafai e se tagata palota e nofo i fafo atu o lona itumalo ona faatino lana palota.

O le Fuaiupu 6. Ua teuteuina le fuaiupu 58 o le Tulafono autu, e famanino atili ai le aso e lolomi ai pepa palota. E tatau ona faia i le aso ua maea ai le tapunia o le faauina i tua o le suafa o le sui tauva. O lenei teuteuga, e fesoasoani i le faagaoioiga ma le faatinoina o palota, e ala i le faamautinoaina o le toe lomina o pepa palota i le maea ai ona faui i tua se sui tauva.

O le Fuaiupu 7. O lenei fuaiupu o lo o faamoemoe e teuteu ai le fuaiupu 60 o le Tulafono autu. O lo o tuuina mai le faatulagina o le palota muamua po o le pre-polling mo le aso e 1 a o lumanai ai le aso o le palota tele. Ma o lea aso e tatau ai ona pau i totonu o le vaiaso lava lea o le palota tele e pei ona atofaina e le Komesina.

O le Fuaiupu 8. O le mafuaaga o nei teuteuga, e faamautino ai o tagata palota sa faatinoina a latou palota muamua, e faatumauiina le faailoilo ma o le a le mafai ai ona taofia Failautusi ona suesueina palota na faatinoina i e na palota ai tagata palota.

O le teuteuga o le fuaiupu 61 o le Tulafono autu, ua taofia ai le faitauga o palota muamua, ae pau lava le tulaga e faatino ai e le Ofisa o lo o vaaia le fale palota, o le faitauina lea o le aofai o pepa palota sa

faaogaina. O lea faiga e ogatusa lelei ma le faiga o lo o taitailimaina ai le faitauina o palota faapitoa po o special votes.

O le isi teuteuga o le fuaiupu 61 ua faia, ina ia faamautinoaina ai le faaogaina o le lisi o tagata palota, mo le palota muamua lea sa faaogaina o le taimi o le palota tele, e faaogaina e se palota laititi. Ua mafua mai ona o se mataupu o se suesuega o se talosaga o le faiga palota tele.

O le Fuaiupu 9, o leni fuaiupu e teuteu ai le fuaiupu 83 o le tulafono autu. E ala i le tuuina atu lea o le palota, sa faatinoina i le palota muamua e faatoa faitauina i taimi o le faitauga aloaia. O leni teuteuga e ogatasi ma le teuteuga na faia i le fuaiupu 61 o le Tulafono autu.

Lau Afioga i le Fofoga Fetalai ma le Palemene ua potopoto. O le Tulafono Tau Faaofi lena, e pei ona taua i le amataga, e le o se tulafono tele naua. Ae e taua suiga o lo o tuuina atu aua lava le faaleleia atili o le faatinoina o la tatou faiga palota o lo o loma nei, aemaise ai o le sauniuniga a le Ofisa, mo le tapenaga o faiga palota laity o lo o loma nei.

Ia faamanuia mai le Atua i si o tatou atunuu pele o Samoa, faatonu folau mai i lona sa i leni Paeaiga fou ua amata. Soifua ma ia manuia.

**FOFOGA FETALAI:** Ia, o lea a faafofoga ma le totoa le paia o le Maota i le tolaulauga a le Minisita o Faiga Palota. E talitonu o lea ua malamalama ia itu uma e pei ona manaomia teuteuga. E talitonu foi o leni Tulafono e le o se Tulafono fou ia outou afioga. O le Tulafono foi e pei ona i ai nai suiga i na foi tausaga, o lea foi ua silasila le Minisita ma le Komesina o faiga palota i nisi foi o fautuaga mai le Faamasinoga ina ia faafaigofie foi le galuega. Ou te talitonu o le tatou galuega e tausoa faatasi, aua lava le faafaigofie o galuega, aemaise o le faiga filifiliga a le atunuu.

O le avanoa leni i sui mamalu e fai foi se sao, o le a foi se fesoasoani mo le tatou Tulafono Tau Faafoi.

O lea e matau atu, o lea ua tulai mai le Taitai o le Itu Agai.

**Susuga Hon TUILAEPA FATIALOFA AUJELUA SAILELE MALIELEGAOI (Taitai o le Itu Agai):** Lau Afioga i le Fofoga Fetalai. Ou te manatu o le a ou tamua i leni taeao. Ae ou te momoli atu foi le faafetai i lau afioga i le tatou taulaga na molia i leni taeao, faamanuia mai le Atua i lo tatou Maota nei.

Ou te faatalofa atu foi i le faafogafoga mai a le Ao mamalu o lo tatou Malo. Le Sui Tofia faapea foi le Faamasino sili ma le Peresetene o le Faamasinoga o Fanua ma Suafa, le paia o Samoa i ona tulaga faalupe. Ma le faanonogamanu o auauna a le Atua.

O le Tulafono leni ua i lumamea, mo le teuteuga mo le faiga palota. E taua ia lau saunoaga, e toe famanatu ai i le Palemene leni, o le Fono Aoaofa Faitulafono le Supreme Law Making Body of this Nation. A

tatou nofoia loa le Maota nei ma tatou soalaupuleina tulafono. E le o se galuega e faapaole ona fai. O le ala lea ou te fia oo ai i faiga faavae a le Palemene lenei. Ua matau ua taoto le faamoemoe o le Malo, o le a faanatinati le tulafono. O lona uiga e le oo i se Komiti o Tulafono. Aua e leai foi se Komiti o Tulafono ua tofia. E faamoemoe atonu pe a oo atu i le faagasologa o le tatou fono lenei, ona tofia lea o komiti e latou te galulue e faamapue atili le galuega o lo o feagai ma faipule o le Palemene, ina ia soalaupule e le Komiti, ma valaau foi tagata e omai e fai ni latou molimau, ona toe foi mai ai lea o le Tulafono i totonu o le Palemene, ae ua uma ona vaimama. O lona uiga ua uma ona tapa ia finagalo o le atunuu lautele. E faaalua i soo se tulafono ma aafiaga o lo latou soifua. E oo mai la i le Palemene lenei e faaali ai finagalo ua lava ta oso tatou uma, i lipoti e aumai mai le Komiti o Tulafono ona o tulaga foi ua i ai le tatou Palemene ua le mafai ai ona gafatia lea tulaga. O lona uiga, e fai atu ia lauga nei, a o lea ua taoto le faamoemoega o le Malo. Ae le tatau foi ona oti i tua se taofi. Afai e le aoga nei, faaoga mo le lumanai, ae taua tele mo sui usufono mamalu o lea faatoa toai mai i le Maota lenei, i le latou fuaitau aemaise foi le latou matau i le faagasologa o galuega, e le i soona faataotoina faiga faavae a le Maota lenei e tusa ai ma tatou Tulafono Tumau. Na mafua ona faataoto ia lava le taimi e soalaupule ai ma malamalama le atunuu o le a aafia. O pili ia e 3 sa vevesi ai le tatou atunuu, e 5 tausaga mai le taimi na tapena ai i le taimi na soalaupule ai i tua i nuu. E ono masina o soalaupule, e faapena tatou aga faa-Palemene, e soalaupule ina ia malamalama.

**Afioga Hon Fiamē Naomi Mataafa (Palemia):** Lau Afioga i le Fofoga Fetalai o le mea e fia faasao.

**FOFOGA FETALAI:** Ia, e vaelupeina le saunoaga a le Afioga i le Taitai o le Itu Agai, tulai mai lau Afioga i le Palemia.

**Afioga Hon Fiamē Naomi Mataafa:** Lau Afioga i le Fofoga Fetalai, o le mataupu e fia faasao. Muamua, ua matau i le saunoaga a le Taitai o le Itu Agai e le o agai mai i le Tulafono a ua talanoaina le ala o mea. O le ala o mea lea e tatau ona uia Tulafono e Komiti. E pei e foliga mai o se mea fou le tulaga faanatinati.

Ou te fia faasao ma faamanatu i le Afioga i le Taitai o le Itu Agai, ai ua galo ia ia le mau Tulafono na faanatinati aemaise foi o Tulafono o Faiga Palota i le faaiuga o le Paeaiuga talu ai.

O le mea lena lau Afioga e fia faasao.

**Susuga Hon TUILAEPa FATIALOFA AUeLUa SAILELE MALIELEGAOI:** Lau Afioga i le Fofoga Fetalai, o lea ou te talanoa atu i faiga faavae, e aoga mo le faafogafoga mai.

**FOFOGA FETALAI:** Ia, o lea ua maua lou finagalo lau Afioga i le Taitai o le Itu Agai. Ia, atonu o lea foi ua saunoa manino le Palemia e lelei lava le agai sao i saunoaga agai le tatou Tulafono o i ai nei, aua a tatou faamasino nei, e tele lava le mau mau eseese.

O le mea lea, tulai mai lau Afioga i le Taitai o le Itu Agai.

**Susuga Hon TUILAEPA FATIALOFA AUELUA SAILELE MALIELEGAOI:** O le tulaga lena. Ona foi mai lea i le Tulafono. Ma a o le i aumaia foi le Tulafono, e i ai a tatou Fonotaga e fai e soalaupule ai, e le i auai foi lenei Vaega. O le aoga o mea ia, a faataunuu mea ia, e le tele ni a matou lauga, e le tele foi ni fesili e fai, aua o lea ua malamalama. O le tulaga taua tele lena o le mea lea ua agai i ai tatou, o le manatu mo le agai i le lumanai. O le tulaga i le...

**Afioga Hon Fiamē Naomi Mataafa:** Lau Afioga i le Fofoga Fetalai o le mea e fia faasao.

**Susuga Hon TUILAEPA FATIALOFA AUELUA SAILELE MALIELEGAOI:** E le tatau... Lau Afioga i le Fofoga Fetalai, ua faalavelave tele le Palemia. O lea ou te talanoa i ala o mea ma le Tulafono.

**FOFOGA FETALAI:** Ia, o le uiga lava o ala o mea. Alaala mai lalo lau Afioga i le... o le uiga lava lea o le tiute o le Malo, a i ai lava se mea e faasao e tatau ona faasao.

O le mea lea, ia, lavapapale mai lau Afioga i le Taitai o le Itu Agai se i tulai mai le Afioga i le Palemia.

**Susuga Hon TUILAEPA FATIALOFA AUELUA SAILELE MALIELEGAOI:** Ia, faafetai i lau Afioga.

**FOFOGA FETALAI:** Onosai mai lava i lalo le Afioga i le Taitai o le Itu Agai se i tulai mai le Palemia. Ia saunoa lau Afioga i le Palemia.

**Afioga Hon Fiamē Naomi Mataafa:** Lau Afioga o le mataupu e fia faasao, o le saunoaga a le Taitai o le Itu Agai, e le i auai mai latou i le tatou faiga po o le fonotaga faamalamalama o le Tulafono e pei ona masani ai. Ia, e tau lava ina ou faamanatu atu i le Afioga i le Taitai o le Itu Agai, o le aso na fai ai, e le i faatautoina latou. Ma e le omai ni faipule e le i faatautoina e auai i le faasologa o galuega a le Palemene.

**FOFOGA FETALAI:** Ia, o lea ua maua le finagalo o lau Afioga i le Palemia, e talitonu lava le Taitai o le Itu Agai, ia...

**Susuga Hon TUILAEPA FATIALOFA AUELUA SAILELE MALIELEGAOI:** Lau Afioga ua manino foi lea mea, leaga o le

mafuaaga foi o le matou le auai mai, lea foi e ogatasi foi ma le faaiuga a le Faamasinoga mauualuga, ia manino le itu lena.

**FOFOGA FETALAI:** Ia, faataatia lea vaega ae agai loa i le tatou Tulafono lau Afioga i le Taitai o le Itu Agai.

**Susuga Hon TUILAEPA FATIALOFA AUUEUA SAILELE MALIELEGAOI:** O le tulaga la pei ona ou taua, e taua tele mea faapenei i le matau mai foi a Le Ao Mamalu o le Malo. E tatau foi ona tatou ava i Le Ao Mamalu o le Malo i le avatu o Tulafono e aumai e faanatinati. E tele lava le tiute o Le Ao Mamalu o le Malo i le faaiuga o mea uma e alu atu ai i o, ia a le sainia lava e le sainia. O le ala foi lena e ala ai ona valaau le Fono Faatonu e aumai ai lona manatu i se tulaga o la e finagalo i ai o i ai ni faaletonu e aofia ai lava ma ala o mea.

O le Tulafono la lea ua tatou talanoaina nei, o mea nei tau teuteuga o Tulafono o Faiga Palota, e i ai lava le faaeteetega i le faatopelau o Tulafono o Faiga Palota. Talu ona tutoatasi le tatou Malo, o le Tulafono lava e faavae ai se Faiga Palota, faiga palota lea lautele, o le Tulafono foi lena e faatino ai ni palota laiti. O le fesili, aisea? O le tali, ia faalaugatasia Tulafono na omai ai sui usufono e saofafai i totonu o le Palemene lava lea ua alu le Nofoaiga. E matua le tatau le tatau ona ese le Tulafono e fai ai le Faiga Palota Lautele, ae oo mai i palota laiti na afua ona o faamasinoga, ona ese lea o se Tulafono. E le i faia lava se mea faapea, ona e tatau ona fair, e tatau ona amiotonu le auala na omai ai sui usufono i le Faiga Palota Lautele, tutusa lelei ma le auala na omai ai sui usufono i Palota Laiti ona o ni faamasinoga na afua i le Faiga Palota Lautele, ona talafeagai lea. Ma e le i i ai lava se teuteuga o se Tulafono ua faia talu mai ona tutoatasi tatou ua faapea ona fai. O le mafuaaga, o le a aliali mai o le a faailogalanu se Tulafono mo le vaega lea o le a toe faatino a latou faiga palota, ona o le tulaga ua toe teuteu faatopetope lava se Tulafono.

**Susuga Hon Laauli Leuatea Polataivao Fosi (Minisita mo Faatoaga ma Faigafaiva):** Lau Afioga i le Fofoga Fetalai o se mea e fia faamalamalama ma le agaga faaaloalo.

**FOFOGA FETALAI:** Ia, sina malologa a lau Afioga i le Taitai o le Itu Agai, se i tuu atu le avanoa i le Minisita o Faatoaga ma Faigafaiva.

**Susuga Hon Laauli Leuatea Polataivao Fosi:** Ia o le naunau lava e tatao mai i le moa o le ala le tatou galuega lau Afioga i le Fofoga Fetalai. Leaga o lea ua saunoa le sui usufono mamalu ina ia aua ne i toe lotea aiaiga o le Tulafono lea e i ai nei. A o lau matau i le Tulafono, ua ala ona toe tasui ona o le faaiuga lea na aumai e le Faamasinoga. Ua matau e le Faamasinoga le tele o aiaiga o le Tulafono lenei na toe tasui faafuasei i le taimi ua latalata le palota, lea na tupu ai faafitauli. Ia lea la

o le a ou avatua le faataitaiga; fuaiupu 4, e faasa se tagata e toe alu e toe tagi i le isi tagata ona toe withdraw lea.

O le ala lena lau Afioga i le Fofoga Fetalai e ala ona toe tasui le Tulafono ae o lo o loma le faiga palota, ua matau e le Faamasinoga, e tele mea na topelau i le Nofoaiga lea na uma nei. Ia o lea la e taumafai e fufulu le mea lea, lea e ala ai ona mafua ona aumai le Tulafono, 9 teuteuga, e aafia ai mea e saisaitia ai le aia tatau a le tagata e fia o i le palota.

Ia o le faamalamalama lenei ne i te i ua tuuaia faapea ua fai e le Malo nisi aiaiga fou, e leai. O le puipuiga o le Tulafono ia amiotonu. Ia ma lou faaaloalo.

**FOFOGA FETALAI:** Ia o lea ua maua le finagalo o lau Afioga i le Minisita mo Faatoaga ma Faigafaiva. Lau Afioga i le Taitai o le Itu Agai, ia, tau...

**Susuga Hon TUILAEPA FATIALOFA AUELUA SAILELE MALIELEGAOI:** O le mea lea sa ou talanoa atu ai, o le teuteuga o le Tulafono a o le i faia le Faiga Palota Lautele. A uma loa la le Faiga Palota Lautele, o le Tulafono lava lena e fai ai Faiga Palota Laiti.

O teuteuga ia na fai, na mafua ona fai e tuu i ai i totonu vaega sa laga i faamasinoga sa fai a o le i faia le Faiga Palota. E eseese mamao lava le mea lea ou te alu atu ai ma le mea lea na tu mai ai le sui usufono.

Lau Afioga i le Fofoga Fetalai, o le taofi lena. O le faamaoniga o le mea lea, o lea e le o suia lola. E le o suia lola, o lo o tumau pea lola. O lea foi e tumau le lisi o i latou e palota, tagata matutua, o lena e tumau. O le agaga atoa aua ne i suia se mea e tasi, faatoa sui lava ma teuteu se Tulafono tele e aafia ai le atunuu ina ua atoa Nofoa o le Palemene lenei, ua uma mai Faiga Palota Laiti ma ua nofoia le 51 Nofoa o le Palemene lenei, o i ina tonu lava ua talafeagai ai loa. O lea foi ou te matau e ono fai se komisi sutesue mulimuli, a o le faatopelau lea, o le faatopelau fatatau mo le Faiga Palota Laitiiti. O lea la ou te talanoa atu i le tulaga ua i ai le matou taofi. E pei lava ona ou fai atu, o lea ua taoto le finagalo o le Malo, ae le tatau ona oti i tua se matou taofi.

O le isi vaega e fia oo i ai lau Afioga, o le tulaga lea o monotaga, lea ua ou vaai atu o mea faalelotu, po o le monotaga masani e fai e le matai e tautuaina le nuu. E tele lava le eseese o mea ia lau Afioga. O le Faiga Palota 2016, faatoa tuu i ai mea ia o alofa ma taulaga. Na mafua ona tuu i ai, ona o le tulaga foi lea o iinei i le Au Palota Tutoatasi ua liliu e avea ma itumalo faale-aulaga. O le uma ai la o le 2016, lea la ua toe teuteu uma tatou Tulafono ma vaevae ai loa ua le o toe i ai se Palota Tutoatasi. O le faigata o le tulaga lena lau Afioga, ona o i latou ia e leai ni faiganuu o fai ai. E pei la o le mea lea na tau faaoga ai le mea lea e amanaia ai mo le faiga palota lena. Na uma loa ona toe foi lea o tatou i le monotaga, o le mea tonu lava e pitoa i faiganuu. A o mea ia faalelotu, e le taua o se monotaga. O le faigata o le itu lea, e mafai lava

ona tafao le isi ona alu atu lava lea fai na o lana mea faalelotu, ae faapefea faiganuu? Lau Afioga, o le mea lena e taua tele mo le faamamaluina ma le faamalosia o pulega mamalu a alii ma faipule e taua ai le monotaga. O le isi lena mataupu o lea lava matou te faatupu manatu, aua o lea lava ua matou vaai atu ua faauliulito lava le finagalo o le Malo e faatopetope le tatou Tulafono.

O le vaega lea e aafia ai tagata foi ia ua faaopoopo atili tagata e faamaonia tagata ua fai monotaga, ua atili ai ona lavelave le mataupu lena ma atili ai ona faigata ona administer, faatino le Tulafono i le toatele, toatele o latou. E i ai lava itu faigata e afua ai mea faapena, ae le faapea e tuuaititia ai faigata i le toatele o tagata e tatau ona... a musu le isi, faaaoga le isi. E tatau ona faamalosia le mea lena i lalo o Tulafono, ae le o le toe faaopoopo atili, faaopoopo atili, faaopoopo atili, o mea na e sao ai le le amiotonu.

Lau Afioga o lea ou te talanoa atu, e aafia uma ai lava tatou i mea ia, e le na o i inei. O se manatu e avatu ina ia manino ai le matou foi mau.

O le tulaga lea o gasegase lea e faapea a e gasegase ona faataoto lea o auala e mafai ai ona e withdraw pe faafaigata ai ona e withdraw, ona e toe alu ese mai tua ua e le alu i le faiga palota, e le o manino le mea lea, e le o tight foi. Afai e faataua le itu lea, e tatau ona i ai se isi faaupuga i le tulaga o le gasegase ina ia tuu i ai se lipoti mai se fomai. O lea o lo o open ended le faaupuga.

O le tulaga foi i mea ia o le tulaga foi lele lea ua taua ai o le a faaaoga le mea lea e pei se monotaga, o le alofa po o le taulaga, e tatau foi ona faamanino ona o le faitau o lea e aumai totonu o le faamatalaga o le Tulafono, a o totonu lava o le faaupuga o le Tulafono e le o manino. O le faaupuga la e tatau ona matua faamanino i i le tulaga lena, o le tagata e fai lana tautua faale-Ekalesia, ia avea o s Ekalesia ua resitala lelei ina ia ogatasi ma Tulafono a le tatou Malo.

Lau Afioga, o nai manatu na, ae o lea lava ou te iloa lelei le tulaga lea ua i ai le finagalo o le Malo, ae le tatau lava ona oti i tua se matou taofi.

O le itu foi lea na oo i ai lou finagalo, e ta te faitau eseese i le tulaga lena, lea sa umi mai ai le laulauga mai o lou finagalo, o lea foi ou te vaai, o le matua tele foi ia o faasalalauga a le la Itu. Ou te le auai i lou finagalo e faapea o se faaleagaga o le la Itu po o se faaamusia. A matou o atu i fafo o le Maota lena, e i ai le Au Tusitala e o ane, sa fai foi e le la Itu, e o ane ona aumai lea o latou fesili ona taumafai lea e tali.

E pei la o se tuualalo foi i lau Afioga, matou te puipui foi i le Nofoa, puipui i le Maota, ae le o se mea mamalu le matou tilotilo atu i o i le isi Minisita o valaau mai ia te oe ma faatonu mai lau Afioga e taofi sui usufono o le Vaega nei e tulai e aua le talia maia. Leaga o lea e i ai faasalalauga o lea e ola i totonu o le Maota ina ne i te i ua itutasi lau agai mai, ae se i e agai foi i o. Aua e le faapea o lea e omai le Au Faasalalau ia i matou ae le o o foi i o, o la e foi e fai. Ae ou te faamanuia atu ia te oe, ou te faamagalo foi ia te oe.

**FOFOGA FETALAI:** Malo faafetai. O le mea e sili ona taua o lea ua aumai le sao o le Taitai o le Itu Agai i le tatou Tulafono. Ou te talitonu foi o lea pei ua malilie uma lava lena Itu i lou finagalo lea ua faaalua. Ae ui i lea, o le tulaga ua oo i ai le saunoaga a lau Afioga i le Taitai o le Itu Agai, o le tiute lava lena o le Nofoa. O le a lava se mea ua maua e le Nofoa, e ao lava ona avatu. O le agaga maualuga ina ia tumau pea le mamalu ma le taualoa o felafolafoaiga a le Palemene. Ia afai foi o lea e maua lea Itu, ia o lea e aafia uma lava i le faasilasilaga a le Fofoga Fetalai. O le agaga ia maua le toamalie, maua le filemu, maua le tatou fealofani, ia aemaise pe a tatou o atu i tua leaga o la e matau mai le atunuu ia tatou, o tatou o taitai o le atunuu.

O le mea lea, e aoga mea e tutupu e fafagu ai foi ia tatou mo le agai i le lumanai ina ia tatou maua pea e fepalepaleai ma le galulue faatasi, aemaise o le faafofoga tapuai a le tatou atunuu.

O le mea lea, faamalo faafetai saunoa i lau Afioga i le Taitai o le Itu Agai. Ia na o si mea lava lea e faamanatu atu a o le i saunoa lau Afioga i le Sui Taitai, e faaeteete foi i le taua o le Afioga i Le Ao Mamalu o le Malo i a tatou felafolafoaiga, ona o tatou lava ia, o le tatou lava tiute tatou te talanoa i le Tulafono, a o le tofa i le Afioga i Le Ao Mamalu o le Malo, o le mea lena e taatia lava i lana Ia tofa ina ia silasila totoa i ia tulaga. A o le mea lena mo le faamanatu atu i nisi o tatou sui usufono mo le agai pea i luma o le tatou mataupu.

Ae tulai mai lau Afioga i le Sui Taitai o le Itu Agai.

**Tofa Hon LAUOFO FONOTOE NUAFESILI PIERRE LAUOFO (Anoamaa 2):** Faafetai i lau Afioga i le Fofoga Fetalai ua maua se avanoa o lenei itumalo, e faaleoina ai se manatu puupuu e tusa ai foi ma lenei Tulafono Tau Faaofi. Ae manatu ua maea ona e sulaina le alofa ma le agalelei o le Atua i lenei taeao, aua lava le tatou vatapuia ma lo tatou Matai Sili i le Lagi. E talitonu foi o lea ua maea ona paepae ti'a o le tautiaga e a paia sausaugata o le atunuu o faafogafoga mai ma lenei Maota.

E manatu o lea e le toe afea e se matou upu, ae agai tonu se matou foi tautalaga e tusa ai ma le Tulafono Tau Faaofi. E manino le saunoaga a le Afioga i le Minisita, o le tapenaga aua foi palota laiti o loma nei, tatou palota lait e 7 itumalo o le a faatino palota laiti. Ae pei lava foi ona matau i tulaga faapenei, o palota laiti o tafeaga lava mai le palota lautele po o le palota autu ina ua maea tulaga uma o faamasinoga.

Saunoa foi le Afioga i le Taitai o lenei Itu i tulaga o faiga faavae lautetele. Ia e le toe afea foi e sa matou upu ma lenei usugafono. Ae faafetai, o le tulaga lava ia o le resitalaina o le matai, o lea ua faamanino lea tulaga. E tataua ona resitala le matai ae le i oo i le aso e faauluina ai sui tauva i se suafa matai ua finagalo e tauva ai, aua o lea foi e manino, o le tulaga lava o le monotaga e agai tonu lava i suafa matai. Aua e i ai nisi mataupu pei ona tagofia foi e le faamasinoga i le tatou faiga palota lea na tuanai atu nei. E i ai nisi ua leva ona uma ona

faatino saofai, ua maea foi le tulaga o le faatinoga o le aganuu, ae peitai, e le i resitalaina lava le matai i le tele o tausaga, a o la e sa faatino tulaga tautua faamatai i le tele o tausaga, a ua lata i le faiga palota a ua i ai le finagalo o le a tauva. O lea la e vaai atu i le tatou Tulafono, ia ua maua la le avanoa lea, ua le toe faatali faapea e tatau ona resitala se i... resitala i le tolu tausaga a o lumanai ai le faauluina o le sui usufono.

Ae i le vaega tonu lea e mafua ona ou oo i le tulaga lea, ona e pei o i ina lea na fua mai ai le tolu tausaga o le nofomau i Samoa ma le tolu tausaga o le monotaga. O le nofomau i Samoa po o le residency, se i silasila lau Afioga i le Minisita, e fua le 3 tausaga a o lumanai ai le faauluga o le sui tauva. O i ina foi lea sa i ai le agaga foi lea o le Tulafono ina ua aumai le Tulafono lenei i isi Paeaiga ua tuanai, e o tutusa lava le taimi o lou nofo i Samoa i le tolu tausaga lena ma lau monotaga faalenuu. O lea la ua ou vaai atu i le teuteuga lea ua aumai, na pau lava le mea e tatau ona faamaonia, o le tolu tausaga sosoo, po o le a lava le tolu tausaga i tua atu. E pei e foliga mai e leai se tapulaa i le alu i tua. E i ai la le isi faamasinoga lea pei ona silafia e lau Afioga, lea sa tulai mai, pei o monotaga o tausaga sosoo e tolu i se vaitaimi o le 1990 ea po o le 2001 agai mai luma. O lea la ua aumai ua amanaia e le Faamasinoga mo le tolu tausaga la lea e lumanai ai le faiga palota.

E i ai le fautuaga ma le tuualalo, e tatau ona i ai se tapulaa o le alu i tua. Aua e pei o le vaai lena a lenei itumalo, o lou nofo ai i Samoa i le tolu tausaga a o lumanai ai le avea o oe ma sui tauva, o le tolu tausaga lena e tatau ona e agai i lou itumalo, agai i lou afioaga e toe faamasani ona fai lau tautua. Ia ma e alu i saofaiga ma fonotaga a le nuu. E pei o le agaga lea i lau vaai i le tulaga foi lele o le faiga faavae na mafua ai Tulafono nei, e ogatasi mea e tolu, o le monotaga, o le suafa matai ma le nofo ai i Samoa. Ae tau ina lafo atu e silasila i ai lau Afioga i le tulaga lena.

E faasolo mai i le tulaga o le monotaga, ia o lea la ua i ai le finagalo o lau Afioga ma le Malo e toe aumai i totonu monotaga faalelotu. Ia o le ogasami foi ua tatou foi mai ai e le o se mea fou, sa tatou i ai muamua foi i lea tulaga. Ua finagalo la e toe aumai totonu le tulaga lea o le monotaga faalelotu. I lau vaai atonu e leai se afaina. Na pau lava le mea, e pei ona saunoa atu foi le Afioga i le Taitai i lau tau faalogo atu i lana ia foi folasaga, e le i agavaa sui usufono ia na tauva i le palota autu po o le palota lautele i le monotaga lea faale-Ekalesia, a o lea o le a agavaa ai latou ia o le a tauva i le palota laitiiti. Ae pei lava ona ou talanoa atu, o palota laiti o le tafeaga lava mai le palota autu po o le palota lautele. O lea la o le a i ai le agavaa fou lea o le a agavaa ai i latou ia e le i maua e latou ia sa tauva i le palota autu. E tau ina ou faapena atu i lena tulaga e silasila i ai lau Afioga, ona e tatau ona tutusa. O le talitonuga lena, e tatau ona tutusa uma agavaa sa i ai i le palota autu o lola palota, faapea foi o lea e aumai i i o le pre-polling, e leai foi se mea e suia, e tatau foi la ona faapena palota laiti. E le tatau

ona i ai se suiga i le tulaga o agavaa ma tulafono o tatou palota laiti, ae silasila i ai lau Afioga i lena vaega.

O lea foi la ua aumai le tulaga foi lele o se isi tagata e faamaonia, pe a faapea e tapa atu i le pulenuu e sau e faamaonia le monotaga ae musu le pulenuu, pe o se isi mafuaaga ua musu ai. Ia, e talitonu e faapena foi le tulaga i Ekalesia. O le mea e tatau ona faamanino i le uiga o mea ia, aua o le Ekalesia, ia, atonu po o le failautusi a le Ekalesia e agavaa e aumai e fai le faamaoniga o le tulaga lea o le monotaga faale-Ekalesia. Ae manatua foi lau Afioga, i Paeaiga ua tuanai ma le Tulafono sa mafua ai ona tuu i totonu o le Tulafono monotaga faale-Ekalesia, ona o le vaitaimi foi o fai le tatou urban seat, mea o nofoa ia tu taulaga, ona o latou na e le o o i ni faiganuu, e le o lavea i totonu o faiganuu ia i totonu o le Vaimauga ma Faleata. O lea la sa faaaoga, o le auala le o latou monotaga, o Ekalesia o lo o tautua ai. Ia tau ina ou faapena atu i lena vaega, ae silasila aua o lea la ua aumai monotaga faalenuu...

**Susuga Hon Laauli Leuatea Polataivao Fosi:** Lau Afioga i le Fofoga Fetalai o se mea e fia faamalamalama.

**FOFOGA FETALAI:** Lau Afioga i le Sui Taitai o le Itu Agai se i tuu atu le avanoa i le Minisita mo Faatoaga ma Faigafaiva mo se fesoasoani foi. Tulai mai le Afioga i le Minisita.

**Susuga Hon Laauli Leuatea Polataivao Fosi:** Faafetai. Ina ia manino lava ma malamalama le mataupu lea o monotaga faale-Ekalesia ina ne i matau mai le atunuu e le i i ai se taimi na tuu mai ai se fautuaga a o matou saofafai foi i ina i mataupu lava nei o monotaga faale-Ekalesia. E le o se taimi muamua la lenei ua taumafai atu ai le mataupu lenei. Manatua foi le petitions lea na aumai lea na saina uma mai ai Taitai o Ekalesia, Taitai o le Ekalesia EFKS, Taitai o Ekalesia Lotu Pope, Taitai o le Ekalesia Metotisi, ia e aumai le petition e le iloa po o fea na oo i ai. Ia o aga foi na sa taumafai atu i lena taimi, ae ua outou le finagalo foi e talia monotaga faale-Ekalesia. O le matou la mau ma le faamoemoe, afai sa taumafai atu i lena taimi e le i sao, ia o lea ua taumafai atu, ave le avanoa i monotaga faalelotu i isi o tagata o lea e taumafai mai e tauva i le palota. O le faamalamalama lenei lau Afioga ina ne i matau mai sa le i faia muamua. Ma le agaga faaaloalo.

**FOFOGA FETALAI:** Ia, tulai mai lau Afioga i le Sui Taitai o le Itu Agai.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, o lou taumafai atu mo le faasaoina o lou taimi ia faaaoga lou taimi. Ae a matau mai i le sui usufono mamalu lea na faauilavea, o lea na ou fai atu ou te le o tetee i le aumai i totonu o monotaga faale-Ekalesia. O na foi tulaga e te saunoa

i ai, ou te le malamalama i ai aua ou te le i saofai i totonu o... ia ou te le iloa po o fea na ave i ai lena pepa. E faamalulu atu ai, ou te le o malamalama. A o lea e agai atu lau lauga, ona o lea ua toe aumai i totonu le tulaga lea. Ia e le faapea ou te tetee i le Ekalesia ma tulaga e i ai.

Pau lava lea mea e taumafai atu ai se manatu, ia faamanino tulaga ia e pei ona toe aumai ai le tulaga lea o Ekalesia. Manatua monotaga faalenuu, o lea e aumai, sui o le nuu po o sui o le Malo, sui tamaitai, ia la ua i ai ma le tulaga fou lea ua aumai, afai e le mafai e se isi o le toa-2 lena ona filifili lea pe tofi e le Komesina o Faiga Palota se isi tagata o le nuu po o le afioaga e mafai ona molimauina. E i ai la aiaiga ia pei ona saunoa lau Afioga ina ia i ai se mea e mafai ona faamaonia, ma o se isi o la e saofai ai i totonu o le saofaiga a le nuu. O le tulaga foi la lena e tatau ona faapea na fai i i le tatou monotaga faale-Ekalesia, aua o lea e aumai le monotaga faalenuu, o le sui o le Malo, sui o le pulenuu po o le a le tauga, a o Ekalesia, ia pei o lea e le o manino mai po o ai le Ekalesia, po o le susuga i le faifeau po o le Failautusi po o se isi lava tofi o le Ekalesia e tatau ona sainia le pepa lea e faamaonia le monotaga faale-Ekalesia.

A o vaega na e pei ona fia oo i ai se tautalaga, ia e faapea foi la i le tulaga lea o le sui tauva e faaulu le talosaga ina ia faaleaogaina le isi sui tauva e aua ne i tauva i le palota ae mulimuli ane toe faau i tua ia le... o lea la sa saunoa le Afioga i le Taitai, e tatau ona faamanino aua na pau lava le mea lea e aumai, pau lava le mea e mafai ai ona toe faau i tua le suafa pe a faapea ua gasegase i se gasegase tuga, serious illness le upu lea e aumai i le gagana Peretania. E tatau foi la ona i ai ni tulaga faamaonia o ia mea po o pepa a le fomai po o le a, a o a foi ituaiga gasegase, aua e tatau ona aofia uma ai gasegase o le tino ma gasegase o le mafaufau. O mea uma ia e tatau ona aofia uma po o a ituaiga gasegase. Ae manatua foi lau Afioga a le Minisita, pe manuia lava lau taumafaiga, faataitaiga o au; manuia lava lau taumafaiga ou te alu e sue le isi e le agavaa e aua le tauva i le palota, ae a uma a la le sue ua manuia lau sue ou alu au ia ou tafaofao aua e leai sou faamoemoe foi lea ou te malo i se palota, e leai foi sou agaga e palota ni tagata ia te au, ia, e leai lava se... e pei e foliga mai e leai lava se uiga tele. Ia pe uma foi ua faiaina le sui usufono lea ua le agavaa e alu i le palota, ia ou alu au ia i Niu Sila ou tafaofao ai ou toe sau pe a uma le palota, a o la e ua alu ai lava lou igoa i totonu o le pepa palota ma le faiga... O le uiga o le tala lea e fai atu, silasila pe tatau ona i ai se faasalaga, penalty.

E agai mai se tautalaga lau Afioga i tatou mea ia o special booths. Malo faafetai, faafetai o lea ua toe aumai lea vaega, ae o lea lava e silafia, e le o se mea fou foi lea mea. Ae manaia tele pe a ou fua ma ou tilotilo i le tulaga foi lele sa oo i nai o tatou tagata palota ia sa agai i Savaii, e oo lava i matou itumalo i inei. Aua o lea e taufai si maomao i tua, ia ua aveese la special booths, ia e tele foi luitau na i ai i lena vaitau ma le taumafaiga foi a le Ofisa o Faiga Palota e tilotilo i faiga faavae

ina ia toe sui ai la le tulaga foi lea e alu le tagata ia e palota i le nofoaga... A o lea la ua toe aumai tou special booths, ia, tatou toe o se i agai i ai, toe faataitai. Aua o lea ua agai mai le tatou Tulafono lenei, atonu o mea uma nei lau Afioga, o lea ou te taofi ma ou manatua le Tala o le Tupe lea na pasia i le vaiaso na tea nei, la e i ai le vaegatupe la e faaagaaga mo le Komisi o Faiga Palota. Ou te talitonu la o le Komisi masani lava foi lea pe a uma faiga palota ona filifili lea o le Komisi e o e toe sailiili ma toe tilotilo i le faiga palota, o a ni luitau sa tulai mai, a o a ni teuteuga o le Tulafono e tatau ona toe aumai i totonu o le Maota mo le faaleleia o le fagasologa o le tatou faiga palota.

Ae faafetai foi i isi vaega ia pei ona aumai, o tulaga i mea ia sa aumai i isi faaiuga o faamasinoga, lau Afioga ona o lea tatou te i luga o lauga faalauaitele o le Tulafono Tau Faaofi, a o lea o le a faaiuiu atu...

**FOFOGA FETALAI:** Toe tasi le minute le sui usufono.

**Tofa Hon LAUOFO FONOTOE NUA FESILI PIERRE LAUOFO:** E i ai isi mea ia ua aumai mo iuga a le faamasinoga, o mea foi nei mo le aganuu. O lea ua i ai tupe foi ia e ave i le aganuu, faataitaiga, o le usu a le nuu, o mea o lafo o lauga, lafo o i latou na o i le faatau, tupe mo le ava. E pei o lea ua aumai faaiuga a le faamasinoga, e le lavea i totonu o faatosina po o ni solitulafono mea na. Ia se i silasila lau Afioga i tulaga na, aua o lena e faaagaaga mai le upu foi lea, aua o lena e silafia e lau Afioga, o lau Afioga foi o le susuga i le loia, o lea e faaagaaga mai le upu lea, o mea ia o la e culturally appropriate.

Na pau lava le isi mea pei e atugalu ai ma atumatagi se manatu pe a tilotilo atu i faaiuga ia, e pei e foliga mai e le ai se tapulaa, e leai se faavasegaina o le aofai o tupe, tupe ia e faaagaaga i mea o lafo...

**FOFOGA FETALAI:** Ia, ou te fautuaina le sui usufono mamalu.

**Tofa Hon LAUOFO FONOTOE NUA FESILI PIERRE LAUOFO:** O isi nuu ua \$500 fai mai o la e lelei, o isi nuu po ua oo lava i le \$10,000 pe fia. Lau Afioga i le Fofoga Fetalai...

**FOFOGA FETALAI:** Ou te fautuaina foi lau Afioga i le Sui Taitai, o lau Afioga foi o le alii loia ae le aoga ona tatou oooo i mea ua uma ona faauigaina e le faamasinoga, o lena e te silafia. O le mea lea, tatou...

**Tofa Hon LAUOFO FONOTOE NUA FESILI PIERRE LAUOFO:** Lau Afioga, pei o le mafuaaga lena lea sa ou talanoa atu ai i le tatou Tulafono Tumau, e le aoiina foi le tofa a lau Afioga, ona o lea e pei e i luga o lauga foi lea faalauaitele i le Tulafono Tau Faaofi. Ae o mea ia o lea e pei ona aumai i iuga o faamasinoga ae le o i totonu o Tulafono, lea foi la e mafua ai ona ou oo i ai, aua o lea foi la e loma

le tatou komisi. Ia e pei e aoga le tau ina faaleo atu i le taimi lenei ina ia silasila i ai le Afioga foi i le Minisita i tulaga ia.

Ia ma le isi vaega, ia, e faapea foi la le taimi foi lea e faataga ai lou malaga i fafo, aua o lea pei na o le 2 masina lea e i ai. Ia ae manatua foi lau Afioga, e tatau lava ona toe tuutuu i luga foi lena taimi, aua o tatou uma lava, o le toatele o tatou o tatou o sa'o o tatou aiga. O le upu moni lava ia o le mea lea ua i ai tatou i Samoa, o le tele o tatou matai o aiga, o la e ua aumau i fafo. O le tele la o faalavelave, o la e ua fai i fafo. O le tela la o taimi, e malaga i fafo le sa'o o le aiga e alu e fai faalavelave, o aso fanau, o faaipoipoga, o a uma mea uma. Se i silasila ane lau Afioga i lena tulaga ia toe faaopopo se isi taimi e mafai ai ona toesea le sui usufono ma le atunuu. E pei o vaega ia.

Lau Afioga i le Fofoga Fetalai, foi la se matou tala, ia alofagia e le Atua lou soifua, ia faafualoa e le Atua lou soifua. Faafetai foi i le Afioga i le Minisita ma le Tulafono Tau Faaofi. Ia manuia le Fono.

**FOFOGA FETALAI:** Faafetai. Malo. Faafetai lava saunoa. Malo saunoa.

Ia, ua matau atu o lea ua muamua tulai mai le sui usufono mo Sagaga 1. Saunoa le sui usufono mamalu.

**Afioga Hon LOAU SOLAMALEMALO KENETI SIO (Sagaga 1):** Faafetai tele lava i lau Afioga i le Fofoga Fetalai mo le avanoa ua ou tulai atu ai ma le ava tele ma le faaaloalo e faaali foi se lagona o lenei usugafono e tusa ai ma le Tulafono Tau Faaofi ua faapena ona opea i le Maota nei.

E faatolu le faafetai i lau Afioga foi e tusa ai ma le taulaga molia i lenei taeao i le faasagi ma le faapolo i le Atua aua Lana puipuiga ua faapena ai foi ona maua le tatou malosi e sootuli ai foi i lenei taeao i le Maota nei, aua le Fonousu.

Ae o le Tulafono e pei ona opea, e fia fai ai foi se faamatalaga laitiiti e le umi tele lau Afioga. O lea e faapea mai le Afioga i le Minisita e ona le Tulafono, o le sini aoao o le Tulafono Tau Faaofi ia atagia suiga manaomia talafeagai ina ia faailoa ai nisi o mataupu ua aliae. Ae pei o lau matau lena, lea e i ai la suiga nei pei ona toe tolaulauina mai e le Afioga i le Minisita.

A toe tomanatu i ai i le faiga palota lea ua tuanai atu lau Afioga i le Fofoga Fetalai, i le tele naua o suiga foi sa fai e le faigamalo foi lea ua mavae atu, teuteu ai le Tulafono o Faiga Palota ina ia faapena ona mapo ma atagia ai le amiotonu o le faiga filifiliga a si o tatou atunuu. O lea foi la ua matau i ai i lenei taeao e ala i teuteuga ua aumai, ia e feoloolo foi nisi suiga. Ae ou te matau foi i le agaga o le Afioga i le Minisita na ala ai ona fai suiga, ia mo le lelei atili lava. Na pau o le agaga, ia ona o le taimi. E pei e foliga mai o lea ua sui i le taimi... ma atagia ai le tatou faiga palota laitiiti lea o le a gafua nei ua le o toe mamao. Ae maumau pe a na faapea o suiga nei o le a taatia atu aua le

isi foi tatou faiga palota lautele a le atunuu. E pei o le agaga lea. A fua atu i ai, ia, e mamafa ia te au le suiga o le monotaga. O le tala a le tatou atunuu, o le fanua ma lona tapuafanua, o le eleele ma lona tapueleele. E eseese uma faiganuu ma latou fuafuaga i le latou foi faataatitiaga ma le faataotoga o faiganuu i lau lea matau. E pei foi la o si o matou nuu e fai ma faataitaiga. O le monotaga e lautele lona faataatiaga o le matou nuu i le monotaga, e le gata o lau mea e fai a o lou auai ma vaai lou tagata, tulou, pe vaai lou tino i fonotaga, ma ia i ai sou sao i le agaga o le fetufaai ma le tofa tatala i totonu o fonotaga a le nuu. Tasi lea. E le o foliga faapea na o ni mea fai po o ni palapalamalo po o ni saogatupe foi a le nuu e fai. O lou auai ma faaali lou finagalo i le faautaga ma le tofa, o le monotaga lena i le matou matau, leaga e taua tele i le matai le tulaga lea o le faaali o lona finagalo i totonu o fonotaga a nuu.

O le atoaga la lena i lau lea matau o le monotaga. Afai e te faapea mai o la e fai lau saogatupe ma fai au saogamea ae te le auai i fonu a le nuu ma e le participate i le faatalanoaga o mataupu a le nuu, e le o atoa la lau monotaga i totonu o le faiganuu. O lea ua ou taua lou nuu e fai ma faataitaiga aua e eseese e pei ona fai atu, ae taua le agai i luma. Ae a fua la i ai i le monotaga lea ua faapena ona aliae mai nei, e le gata la o lea ua tatala i tua lau Afioga i le Fofoga Fetalai, ae o le a aafia uma ai le lautele. O lona uiga ua oo lava i le matai ua faapena ona faatea ma le nuu, ua faapena ona mafai ona agavaa e alu i le Tulafono lea ua i ai nei. O se tala foi lea e toe tomanatu ai ma toe fetuunai ai muniao leaga o le tofa o lea e faapena ona atagia ai po o fea o taoto ai le aganuu.

Afai e tea le matai ona o se sala tuga, ou te le taua aua e tele lava faasalaga e ala ai ona tea pe tafea ma le aufuefue, soloa ma le aufuefue. O le tele ia o... Ioe. A o la e lava e resitala i le api resitala a le tatou Malo lona matai, e foliga mai la e mafai lava ona alu i lalo o le monotaga lea o le a toso i tua le taimi faatapulaa.

E pei o le agaga lea lau Afioga i le Minisita e ona le Tulafono, se i toe tilotilo ifo lava i le tulaga lea, ioe, ma le matai foi lenei e uma loa ona alu lava lea e fai lona saolotoga e le ano mai i le nuu ma le manatu mai i le mea na ala ai ona matai ma avea o ia ma matai ma...

E pei o le agaga lea o le Tulafono o lea e taumafai atu ai, se i silasila ane po o talafeagai. O lea na i ai le taimi faatapulaa mai le aso e fai ai le nomination date, ia ona toso lea i tua o le 3 tausaga. Ae a tatou matau la i le mea lea ua i ai nei, ia ua... ioe, ua one size fits all le mea lea ua i ai pe a ou vaai atu i le tatou Tulafono. Se i toe silasila ane i ai lau Afioga i le Minisita.

E pei o nai vailiu ia o lou lea tulai atu, vaai totoa i le aganuu, vaai totoa ia mapo a tatou upufai. Ia o le a le aoga e ulagia ai, o la e na fai mai o le toaina na tea i le pule le uma ua faatea e le nuu, tulou le Maota nei, ae vaai atu o la e sau e alu i le faiga palota. Oi aue tafefe. Ia o le agaga lea.

E pei o nai motugaafa ia lau Afioga i le Fofoga Fetalai. Ioe. Faamalo aua le faamoemoe o le Afioga i le Minisita ma lana Tulafono. Ia maua lou malosi e faatino ai le tatou fonotaga. Soifua ma ia manuia.

**FOFOGA FETALAI:** Faafetai lava. Faamalo saunoa i lau Afioga i le sui usufono mamalu. Ia ua matau atu o lea ua tulai mai le sui usufono mamalu mo Vaimauga 3 Tapunuu, ia saunoa ia lau Afioga.

**Afioga Hon TAPUNUU NIKO LEE HANG (Vaimauga 3):** Faafetai i lau Afioga i le Fofoga Fetalai mo lou avanoa i lenei taeao fou. Ia, o le aso lenei tatou te fiafia ma tatou olioli ai ona o le alofa ma le agalelei mai pea o le tatou Tapaau oi le Lagi, ua o tatou aulia mai ai lenei taeao fou. E faafetai foi i lau Afioga. E fia piiama foi i le talosaga siitia aua se faamanuiaga mo i tatou i lenei aso. Ia o lau tatalo ia maua pea e tatou le filemu o le Atua. A i ai foi ni matou fautuaga po o ni tuualalo foi, ia onosai ma... le agaga o le Atua ina ia... Lau Afioga o le tatou galuega, o le galuega faifaatasi, o le sa e fautasi. O a ni tou Tulafono e tuuina mai, o le matou lava galuega faa-Itu Agai, o le faufautua ma tuualalo. Ae pule lava outou, a avatu foi e le talia, ia viia le Atua.

Faafetai i le Afioga i le Minisita mo teuteuga ua tuuina mai i nei teuteuga taua aua le tatou tapena atu i le tatou faiga palota laitiiti lea e loma nei. Pau lau tuualalo lau Afioga i le Minisita, se i tagai ane lava pe le avea lenei teuteuga e benefit ai sui ia o le a tauva i le bi-election, ae sa le i faaogaina ia mea i nai sui ia na o i le general election, a o lea ua toe faiaina i le Faamasinoga. Na ona tuu atu faapena lau Afioga ae tagai ane i ai pe le..... pe disadvantage ai e foi ua faiaina mai le general election a o lea ua teuteu mea ia o le bi-election e manuia ai latou. Ia na o se tuualalo atu i lau Afioga.

E fia piiama foi i le saunoaga a le Taitai ma le Sui Taitai o le matou Vaega, ia ma se sui tuai o le matou Vaega Faaupufai i saunoaga foi ma tuualalo aemaise foi ni tulaga o lo o faaalua atu i matou fautuaga. O le matou talitonuga, ia o ni mea ia e teuteu ma toe faalelei ai. Ia manatua foi e lau Afioga i le Fofoga Fetalai, e eseese uma lava o tatou manatu ma o tatou finagalo, ae tatou te tuu lava i le Atua le faamoemoe ina ia maua ai se tali tatou te manuia ai, manuia Samoa manuia ona tagata, ia manuia foi le tou faigamalo.

Lau Afioga i le Fofoga Fetalai, e le tele foi ni manatu e fia faaalua, pau lava lau Afioga o mea sa sau ai tatou i le maea o se faiga palota, ona tofia lea o se komisi suesue e saili ni tulaga sa faaletonu ai le faiga palota. A ua fou la lenei mea ua tulai mai, o lea ua fai suesuega ae le i iu mea o bi-election ma tulaga uma faapena, vaai foi ni mea e tulai mai i bi-election e faaletonu ona tapena lea e tuufaatasi ai ni fautuaga aua le agai atu i le isi faiga palota pe a maea le 5 tausaga ona taatia atu i le tulaga lea.

O mea ia ou te fia tautala i ai lau Afioga i le Fofoga Fetalai e avatu ai le faamalo i le Afioga i le Minisita, o le aso lea e toe faailoa mai ai le tatou pre-polling. E pei o le tulaga foi lea sa tapena i ai le matou Vaega pe a toe tulai mai, ina ia tasi le aso o le faiga palota, ae leaga la e tuu ai la ma le pre-polling i le aso lava lea e tasi. Ae vaai la ni booth special e fai ai la pre-polling ia mo tagata matutua ma tagata ua le lava le malosi o le tino.

O le agaga o lau fautuaga, ona o lea e matau atu foi i le isi tulaga o le Tulafono, ina ia aua ne i faaletonu tapenaga a le Ofisa o Faiga Palota i le faitauga la lea o palota. A faatino i le aso e tasi, ia tasi lava le faitauga ona leai lea o ni masalosologa foi lele i le tulaga ua sese le faitauga po ua le mulimulitaia se tulaga o le process o le faitauga o le tatou palota.

O lau tuualalo, ia fai i le aso e tasi ia aua ne i faaesea le pre-polling, ae taatia atu i lau Afioga i le Minisita.

Ia ma le mataupu la lea o le suiga mai o tatou booths. Sa i ai foi le manatu o le matou faigamalo e tataua ona sui, leaga... Ia manatua foi lau Afioga i le Fofoga Fetalai, o nei suiga sa tapena mo le faaleleia ona e ai tulaga foi ia sa molimauina, o le toatele o tagata ia e resitala mai tua, ae pei e tau masalomia. I isi faiga palota ua tuanai, e tele ina faitau atu faiga palota i booths ia e i tua atu ma le itumalo, e malo ai le sui. E pei o tulaga ia sa taumafai pe fai uma i itumalo latou palota, ma afifio atu ai le mamalu o le atunuu e faatino ai a latou faiga palota. O le tau control ina la o le tulaga lea lau Afioga, lea foi sa ae ai se manatu o le Minisita foi i lene vaitaimi ina ia fai se suiga. Ia manatua foi o suiga lava tatou te iloa ai le lelei ma le leaga. O lea la ua matauina le tulaga faaletonu o le afifio atu o le mamalu o le atunuu iinei i Upolu po o Salafai foi e omai i itumalo. O lea la ua i ai le teuteuga sa matou fuafuaina, ae o lea faafetai i le Afioga i le Minisita o lea ua toe taatia tonu lava le tulaga lea sa matou tapena. E tele faaletonu sa matou matauina i le agai atu o le mamalu o le atunuu e fai latou faiga palota i totonu o latou itumalo.

Ia pei o le tulaga la lene lau Afioga o lea e lagolagoina ai le vaega lea o le Tulafono e 101%.

Ia a o lau fesili lau Afioga i le Minisita, pe i ai ni suiga o lola, aua o lou talitonuga e tataua lava ona faaaoga lola ia sa fai i le palota lea na mafua ai le bi-election nei. A o lau tuualalo lene pe a faapea e taua i o outou finagalo, e tataua pea ona tatou faaaogaina lola ia mai le faiga palota tele e faaaoga i le tatou bi-election ae aua ne i toe faaopoopoa ni tagata, leaga o tagata lava nei sa faaaoga i le faiga palota tele, e le tataua la ona suia seia maea le bi-election ona faatoa toe sui lea o lola mo le isi faiga palota.

Ia pei o nai manatu ia po o ni nai tuualalo foi e tuuina atu i lau Afioga i le Minisita, a o isi mea ia ua laga e le matou Taitai ma le matou Sui Taitai, ia ou te auai foi i saunoaga ia.

Ia, ma lou faaaloalo lava.

**FOFOGA FETALAI:** Malo faafetai.

**Afioga Sulamanaia Fetaiai Tauilili Tuivasa (Vaimauga 1):** Lau Afioga i le Fofoga Fetalai pe maua se avanoa.

**FOFOGA FETALAI:** Ia, o lea ua matau atu o lea ua tulai mai le sui usufono mo Vaimauga 1. Ia o le avanoa lenesi, tatou agai lava i nisi mea fou. O lea ua maea atu le saunoaga a le Taitai ma le Sui Taitai.

**Afioga SULAMANAIA FETAIAI TAUILILI TUIVASA:** O upu a le atunuu a malie lava se pese ta te fia pese lava. O le ala foi lena o le fia faailo o se manatu o lenesi itumalo i le taua o le Tulafono Tau Faaofi ua opea nei i le Maota. E momoli ai le agaga faafetai i le Afioga i le Minisita aemaise foi o le Komesina o Faiga Palota ma le Matagaluega i le tuuina mai o lenesi Tulafono.

A o se manatu ma se tuualalo i le tulaga lava lea o le faafuaiupu (5) i le monotaga faalelotu. O le fono lenesi a le atunuu o le Fono Faitulafono Aoa, e faataua ai le aganuu, o lau tu ma lau aga. A o le vaai a le sui usufono mo Vaimauga 1 i le Tulafono lenesi, pei o lea o le a ave le faamamafa i le lotu, se i tulou. O lea ua tatou vavae ese pulega a alii ma faipule ua saofaga ai e le fai nuu, le o atu e fai ni mea i totonu o afioaga, a o lea o le a faataua le tulaga lea. O lou popolega, o lea ua tatou faia Tulafono e aveese ai le aganuu, aveese ai le tulaga lea faale-Ekalesia. E mamalu le Ekalesia i le pulega a alii ma faipule. O le ala lea o lou naunau. O lau tuualalo foi i lau Afioga i le Minisita, o oe foi o le Minisita o le Vaimauga, ia se i e tagai ane i le vaega lea. O lou popolega, e i ai nisi Ekalesia e leai ma ni meaafale, oi se i tulou, e leai ma ni alofa ma ni matafale e fai i totonu o le Ekalesia, na o le saofai lava i le saofaiga a matai fai loa lana faamanuiaga, faafetai i lau tautua i le aiga, o le nuu, o le Ekalesia aemaise o le itumalo. Na o le nuu lava la e agai i ai, e leai ma se agai e fai se tautua i totonu o le Ekalesia. A o lea la ua tatou faia le Tulafono lea e faataua ai le monotaga i totonu o le Ekalesia, o lou popolega lea, o lou popolega a lea. O totonu o pulega a alii ma faipule e aumai ai finagalo i e e omai e faia le Malo lenesi. E tofofi mai taitai o le atunuu a o lea o le a saofaga ai, se i tulou, e le aofia uma... saofaga ai e e fai suafa matai o lava i afioaga nonofo ai, e taitasi lava i le tausaga, na o le lotu mulimuli lava e alu atu ai, vaai ai le faifeau, pau lava o le faatalofa i le faifeau toe tuumuli, leai ma se alofa. Ae a oo loa la i le taimi ua fai le filifiliga lenesi e 5 lotu i le tausaga, o le a le tali? Sa ou lotu, e leai ma sau mea na faia, ae sa lotu ona o lea ua kava e le vaega lenesi o le Tulafono. O le popolega lena o le sui usufono. A o le avatu o le tuualalo, e aumai lava taitai i totonu o afioaga. E ala ona e matai, e te alu e tautua lou aiga, nofo ai i totonu o faiganuu. A o e o lea o le a saofaga i le vaega lenesi, e pei foi ona saunoa le Toetaufanua, o le a sau ai le solitulafono o la e faatea mai le nuu, ae

oo loa i le tulaga o le a fai e e omai i le Maota lenei, alu loa faaulu ona o lea ua saofaga i le monotaga lea. O lou popolega lena.

O le isi o vaega e sili ona fefe i ai le sui usufono lenei, se o le a toe faaeleelea foi le afaigaluega paia a le Atua, o le a toe faaeleelea aua o latou lea o lea o le a ave i ai le molimau. Sa lotu le matai lea i lenei 5 tausaga? Ioe, sa lotu lava, e 5 lava ana... faatoa sau lava i lotu mulimuli o le tausaga. Ua saofaga i totonu o le vaega lenei. Ae faapefea e o lo o nonofo lava i pulega a alii ma faipule?

O le tuualalo i lau Afioga i le Minisita, o oe foi o le faamasino o oe foi o le loa, se i toe silasila ane. O le mea e augata ai le sui usufono lenei, o le Maota lenei e faamatietie ai le pulega a alii ma faipule, a o lea ua saofaga le e leai ma se mea e faia i tonu a alii ma faipule. Fai lava le igoa matai i le tatou nuu, o a lea i afioaga e nonofo ai, faatoa o atu lava e ave se mea mo le faifeau ia vaai i ai. Ae a oe lea e te nofo i le tatou nuu e tautua ma vaai o tatou afioaga? E leai ma se mea e faia.

Lua, o le a ou see ese ma le vaega lena o tatou mataupu faalelotu...

**FOFOGA FETALAI:** Ia, talu ai lau Afioga i le sui usufono mamalu... Talu ai ua tatou taunuu i le taimi o le tatou malologa masani, ou te vaelupeina ai le saunoaga a le sui usufono mamalu, o le a maua le avanoa e toe faaauau ai pe a tatou taliu mai le tatou malologa.

A o le i faataatiaese Tualumaga a le Fono Aoao Faitulafono, ou te talosagaina sui usufono o le Komisi Faa-Palemene ua taua i lalo, o le a feiloai le Komisi Faa-Palemene i le taimi o le malologa mo se mataupu taua tele.

O lea feiloaiga o le a faataunuuina i le vaega o nofoaga mo tagata lautele i totonu lava o le Maota Fono. *Sui Usufono: Fofoga Fetalai – Taitaifono, Sui Fofoga Fetalai - Sui Taitaifono, Hon Fiame Naomi Mataafa – Taitai o le Maota, Hon Tuilaepa Dr. Sailele Malielegaoi – Taitai o le Itu Agai, ma le Sui Usufono Sinia ua tofia e le Fofoga Fetalai, lea ua avea ai Hon Lauofo Fonotoe Nuafesili Pierre Lauofo, e 5 i ai sui usufono.*

Ia o le faasilasilaga lea ma le faaaloalo.

E faasilasila atu ua faataatiaese nei Tualumaga a le Fono Aoao Faitulafono mo lana malologa o le taeao.

*Na faataatiaese Tualumaga a le Fono Aoao Faitulafono mo lana malologa masani i le itula e 11:01 i le taeao ma toe faaauau i le itula e 11:51 i le taeao.*

**FOFOGA FETALAI:** Ou te faasilasila atu ua toe amatalia nei Tualumaga o le Fono Aoao Faitulafono.

Ou te tapa lau Afioga i le Palemia mo le lafo.

## LAFO MO LE SUIA O ITULA FONO

**Afioga Hon FIAME NAOMI MATAAFA:** Faafetai i lau Afioga faapea foi le Failautusi ma le mamalu o le Matagaluega o lea ua maea le faamalositino a le Maota i lenei taeao.

A o lau Afioga i le Fofoga Fetalai, ou te faatu le lafo mo le suia o tatou Itula Fono i le aso e faapea, *O le a faaauau pea a tatou Taualumaga seia aulia le itula e 1:00 i le aoauli e le i maea i le tagofiaina o le Tulafono Tau Faaofi o lo o talanoaina, ona tatou malolo ai lea, ae toe faaauau i le itula e 6:00 i le afiafi seia aulia le itula e 10:00 i le po nanei.*

Faafetai.

*Faaluaina e le Sui Palemia ma le Minisita mo Faatoaga ma Faigafaiva.*

*Na faamaonia le lafo.*

**FOFOGA FETALAI:** E faataatiaese Taualumaga ma Galuega a le Fono Aoao Faitulafono o lo o saunoa le sui usufono mai Vaimauga Nu.1. O le mea lea ou te tapa le sui usufono e tulai mai e faaiu mai lau saunoaga ma le agaga faaaloalo.

**Afioga SULAMANAIA FETAIAI TAUILILI TUIVASA:** Faafetai i lau Afioga i le Fofoga Fetalai, ua maea paleauau le taliga o le sua i lena talaga atoa i le Afio o lau Afioga i le Palemia, Susu ai ia Afioga i Minisita o le Kapeneta ma Sui Minisita. Faapena foi i lenei Itu i le Afio atu o le Afioga i le Taitai ma le Sui Taitai, sui usufono mamalu o le Palemene o Samoa. Ua fai foi se faasiligamalosi ma tali le sua i Afioga i Ofisa Sili o Pulega o Matagaluega a le Malo aemaise o Faalapotopotoga Tumaoti, ia ua fai lea ma se... momoli le agaga faafetai i lau Afioga i le Fofoga Fetalai ma lau Matagaluega ia ona o lau faaaloalo foi ua opea i le Maota, i le faamalositino foi aua Taitai o le atunuu.

Ou te toe faaaopoopo atu ia le tulaga lea sa taua e faamamafa ai lou sui usufono i tulaga lava lea i monotaga faale-lotu. Ia ona o le popolega o lou sui usufono. E pei ona taua foi e i ai nisi o Ekalesia e leai ni mea ia e tau o matafale ma ni tulaga faapena, ona o latou lava auaunaga ia e le mafai ona faailoa ia le latou auaunaga e tuu atu i le Atua. O latou ia e foai ma le lotomama. Ae o lea la e pei ua aumai i totonu o le Tulafono nei ia tulaga i Ekalesia, ia e pei o popolega na o lou sui usufono.

O le isi o vaega o le tulaga foi lea e pei o le tatalo foi i le Afioga i le Minisita ona o le popolega mo mea o Pulenuu. Silasila foi i Pulenuu, o sui lava o le Malo e i ai i totonu o Pulega a Alii ma Faipule ina ia faamalosia foi tulaga tau i le... aua o le ala lea ua toe aapa i Ekalesia ona ua le talitonu ua le mafai e le Pulenuu ona faatino. Ia pei o lou

talitonuga o i e tatau ona aapa loa i ai le Komesina o Faiga Palota, ia e faatino ai le auauanaga lena, ona e augata tele lou sui usufono i le faaeleelea o le afaigaluega paia a le Atua ma mea faapena i totonu o a tatou afioga ma nuu ma alaalfaga.

O le vaega lua o le vaega lea 53 lea ua toe teuteu, e faaui ai i tua ia sui tauva. Ia o le isi lea popolega lea o lou sui usufono ona e le o i ai i le Komesina o Faiga Palota le malosiaga e sue ai ia sui tauva. E le o i ai i totonu... o le ala lena e pei e tau augata ai le sui usufono ma avatu ai tuualalo, ia ona o lea foi e i ai ia tuualalo i vaitau lea i taimi e withdraw ma tuu i tua suafa o sui tauva. O lea e faaulu i totonu ia e i ai foi tapulaa ma aso e toe tuu ai i tua, ona o le popolega ia pei foi o lea o le a toe aia atu ia le Tulafono e faamaui i tua o suafa o isi sui.

Silasila foi, o le tele o isi afioaga e o lava sui e faaulu ona o nei mea o vaega faaupufai. Ae e alu alu lava nei mea o afioaga, toe autasi foi, ia tasi ia lo tatou sui, ia ona faaui loa lea o le tasi i tua, ia ae e pei o lea o le a faatulafonoina le vaega lea seiloga o le gasegase, e i ai ia tulaga faapena, ia ona toe mafai lea ona faaui. Ae e pei o le tatalo a lou sui, tatala pea le avanoa i sui, a fia tauva lava faaulu, alu alu lava ua tasi ia le Pulega a Alii ma Faipule, ia po o ua alofa lava i le isi sui lea la te tauva, ia e saofaga e toe faamaui mai i tua lona suafa.

O le Teuteuga lenei o le Tulafono, e i ai lou manatu, ina ia mafai ona... e ala la ona fai Tulafono o se manuia lautele o tagata. Ae afai o tulaga e manuia ai na o nisi o sui ma se vaega toaitiiti, ua le tusa ai la ma le manatu o le sui usufono. O lou popolega faataitaiga la o le Palota tele lea na fai nei a le atunuu, o le tele o isi sui la sa tauva i isi itumalo. E le i tauva i itumalo fou ia o le a toe fai nei ia le Faiga Palota i le 7 lea. Ae e pei la o le a tatala ma pasia ia le tulaga lea i monotaga faale-ekalesia, o lona uiga o le a toe omai nei ia sui tauva muamua, ua saofaga ai i palota e 7 ia lea o le a toe fai nei. O lou popolega lena, o lou popolega lava lena, ona o lea o le a fai e saofaga ai nisi o vaega, ae tuu lava ia i latou sa... e pei e faapena le lagona.

Lau Afioga i le Fofoga Fetalai, ia o manatu lena o lenei itumalo. Momoli le agaga faafetai i lau Afioga i lou taitaiina o lenei Palemene. Ou te fiafia foi lou sui usufono e pei ona saunoa foi ia le Palemia analeila, e matou te le i auai i le pre-sitting, ia ua manaia foi lo matou le auai. A lea ua avatu lava ia o matou manatu, ia ao i ina la, manatu o le a le toe i ai se finagalo o se sui usufono aua o lea sa outou auai i le pre-sitting, ao lenei itula ia momoli le agaga faafetai, ia ona o lea ua matau, ia lea ua 2 nei i le 3 vaiaso o faaauau pea le Fonotaga, ia o le tatou valaauina na e le Atua.

Ia lena foi Itu i le Afioga i le Palemia ma le Kapeneta, ia o outou mama na. Ia tulaga a na o totonu o le Palemene, ia e le milia faauu upu a le atunuu. Leaga o lea e tatou te omai e fai ia Tulafono, fai Tulafono aua se manuia o Samoa ma ona tagata o lo o faatalitali mai.

Ia a i ai foi se tala foi a lenei tagata ua paopapa i lau Afioga i le Fofoga Fetalai, ia toe foi mai i le sui usufono o lenei itumalo, ia manuia ma lou faaaloalo.

**FOFOGA FETALAI:** Malo faafetai mo lou sao taua.

**Afioga Vaele Paiaau Iona Paiaaua Sekuini (Gagaifomauga Nu.2.):**  
Lau Afioga i le Fofoga Fetalai...

**Afioga Hon LAUTAFI FIO SELAFI PURCELL (Satupaitea):**  
Lau Afioga i le Fofoga Fetalai....

**Afioga VAELE PAIAAUA IONA PAIAAUA SEKUINI:** Se i fai foi se vasai o lea Itu...

**FOFOGA FETALAI:** O lea ua maua atu e le Nofoa o lea sa muamua faailoa mai ia le sui usufono o Satupaitea. O lea e faamalie atu i le sui usufono o Gagaifomauga, ia se i faamuamua mai ia le sui usufono o Satupaitea, ia ona sosoo ai lea ma lau Afioga i le sui usufono mamalu.

Ia saunoa mai le sui...

**Afioga Hon LAUTAFI FIO SELAFI PURCELL:** Faafetai i lau Afioga i le Fofoga Fetalai, ia ua uma ona e sii ia le tatou taulaga i le Atua, ma uma foi ona paepaeulufanua ia le tatou taeao nei. Ia o lea ua oo mai i lenei itula o le tatou talatalanoaga, ia o nai manatu lava e tuu au i i na i le Faigamalo, ona sa i ai lava le naunau, e tatou te auai uma i le pre-sitting a le tatou Palemene, ona o au le isi sa ou fia auai semeamanu e leai ni tele o fesili e toe avatu.

O au le isi sui usufono na sau lava ou te auai i le pre-sitting. Ia ae peitai, ia ua le taliaina matou, ona sa i ai lava lou agaga, o le pre-sitting, e le o se vaega aloaia o le tatou Palemene. E le o se statutory requirement, a e le alu i le pre-sitting, e le mafai ona e sau i totonu i inei. A le faatautaina foi oe, e te le alu i le pre-sitting.

O le mea lea o le Presitting e pei o se mea na faatu... e le i leva, ina ia faagai oi lelei ai manatu ina ia aua ne i umi ia le tatou Fono. Ae leai se tulaga i ai i tatou Tulafono Faavae faapea ia tatou Tulafono Tumau, i lou lea iloa o i ai se manaoga e tatau ona faatauto oe ona faatoa e alu ai lea i le pre-sitting. Leaga e le o se vaega aloaia o le Palemene lenei, e pei o le faatautoga ma tulaga faapena. O le tulaga lena e na ona tuu atu i ina mo le lumanai.

Lau Afioga, faafetai i le Minisita mo Teuteuga. Ae e tele lava ni manatu, e tele lava ni manatu e tatau ona tapena lelei mai i ai matou uma nei e fia malamalama ai. Ia e lagona o Tulafono faapea e le tatau ona faavavevaveina, e tatau ona saausi lelei aua e tele aafiaga.

Lau Afioga i le Fofoga Fetalai e tele ituaiga scenarios e tulai mai i le mea lea ua tulai mai nei. A faamalaulau atu nei, o faiga palota i tausaga

uma, e tatou te faia ni Tulafono ma lo tatou manatu, o lea la ua atoatoa. Uma mai ia le Commission of Inquiry o lea la ua atoatoa e le toe i ai ni mea e toe tutupu mai. Ae o lea e tatou te silafia, uma le faiga palota, toe fai foi le isi Commission of Inquiry aumai le latou lipoti tatou faapea foi lea, o lea la ua atoatoa, o lea ua atoatoa. Uma foi lene faiga palota, ia o le mea lava e tasi, toe fai foi le isi Commission of Inquiry. Ia lea la ua tulai mai le mea lea, ia lea ua momono mai faa-amendment.

Ae o lou talitonuga, o Tulafono ia na alu ai le Faiga Palota tele, o Tulafono na e tatau ona o tatou o ai i le Faiga Palota laitiiti lea. Aua le toe tasuia ni mea i le ogatotonu, aua o le mea la lea ua tulai mai, o lea o le a aafia ia le aiatatau a isi tagata sa tatau ona o ai i le palota tele ae o lea e le mafai ona o, ona o Tulafono sa i ai. Ae o lea la ua tatope nei suiga ina ia aofia ai, eligible ai e o i le Palota laitiiti.

O lou talitonuga e le fetau lene mea. O le Tulafono lava sa i ai, e le o suia foi lola ma tulaga, na pau lava le mea, toe fai faiga palota o tagata lava na eligible, o. O tagata e le i faamanuaina le Tulafono i lene taimi, ia malolo. O mea foi nei o faaiuga a le Faamasinoga, tuu se i fai i le Faiga Palota tele. Ae o i latou ia na sau ia le faaiuga e tatau ona o i le bi-lection, ia lelei.

O le manatu o le tele lava o manatu lea ua uma ona faaleo atu e le tele o sui usufono mea lava ia o monotaga. What constitutes religious activity? O le mea na lea ou te... e le i leva tele foi na faamalamalama, what constitutes a monotaga? Faale-nuu. Ae o lea ua tuu mai ia le... o se mea lelei. E leai o le service foi le mea lene.

I lou talitonuga ia malamalama lelei ia le atunuu, malamalama uma ia Ekalesia, o le a le mea lea e tau e tatou o le monotaga faale-lotu. Aua o le monotaga lava ia faale-lotu i le tele o Ekalesia, o lau matafale. Ae e le tutusa uma ia Ekalesia. E ese foi ia isi Ekalesia ma le malamalamaaga i le mea e tau o le service i le lotu. E tatau ona malamalama lelei mea ia, ia aua a leai, ia e matua fiu la ia le Ofisa o Komesina e faamalamalama i tagata i taimi o le a fai ai palota. E pei ona fai atu, e omai foi lava tagata ma latou lava interpretation o le Tulafono lenei pe a le malamalama lelei le faiga, ia sao le faiga.

O isi foi nuu, e leai nisi o Ekalesia. A sau nei la e ese le mea la e lotu ai, a lea e fia alu i lona nuu lea e nofo ai, o le a faafefea la ona fai? E aumai la lona monotaga la e fai i le Ekalesia la e i le isi nuu? Pe afai na e leai sana monotaga faale-nuu. E faafefea la? O lona uiga la ua disadvantage ia lene tagata? Ona e ese le falesa la e agai i ai lona ia aiatatau e alu ai i le falesa e finagalo i ai. Faataitaiga o au, o au i lo matou itumalo, e leai se Lotu Katoliko. Ou te lotu la i o i Vailoa. A faapea la e leai sau monotaga faale-nuu o fea la le monotaga ou te eligible ai? A lea ou te nofo i i Satupaitea, a faapea o lea e tatou te talanoa i le mea lea e faamalamalama mai i i. E mafai la ona alu le... sau le faifeau i o i le isi nuu e molimau e sao o lea e fai lau monotaga? Ia ae o lea ou te alu i le palota i le isi nuu.

O tulaga faapena o nai scenarios ou te alu e fai lau palota... aua o lea e leai se taimi se time limit po o le alu agai i tua. O lea foi na faamalamalama e le isi sui usufono, afai la na ou nofo i le 30 tausaga talu ai faale-lotu, faale-ekalesia ou toe foi mai, ou sau ese le mea ou te nofo ai, pa ma nonofo ai ma sou toalua i le nuu o le fafine. O mea nei e tulai mai... these are scenarios lea ou te fai atu ai, ae oo i le taimi o le palota ou fia alu i le palota i Satupaitea.

A lea... pau lava le mea o le 3 tausaga ia faamanuiaina, ao le Tulafono o le monotaga faale-nuu, 30, 60 years ago pe a foi lea... pe afai lava e tatou te o ai i le auiliiliga o le Tulafono nei. E te alu atu i lou nuu ua le malamalama lou nuu po o ai oe? E te alu atu foi e tau sau se isi, ia ua galo ia oe... o ai e i ai ni faamaumauga e sao sa fai ia lau monotaga? 50 i le 40 tausaga talu ai? Ia e tatou te le iloa lelei o nuu e leai ni a latou faamaumauga faapea e 30 tausaga o keep. These are scenarios o lea ou te talanoa atu ai e ono tulai mai, e tulai mai, leaga o le Faiga Palota nei a le atunuu e sau uma i ai manatu o tagata.

Ia o nai manatu na, o lea ou te manatu ua uma ona fola atu. E tasi lava le isi mea, o le mea lea e faapea o le tagata lea e faapea o le a faamaonia e le Komesina e over and above o le toalua lea o sui o le nuu ma sui tamaitai. I lou talitonuga o tagata nei e pei ona saunoa le isi sui usufono, o tagata ia o tagata faigaluega a le Malo o lea e totogi. E le tatau la ona oo se mea faapea e musu, leaga o lea ua tuu i lalo o le Tulafono. O le a allow ai la tagata nei e taga ona musu. O aufaigaluega a le Malo afai e musu, molia i le Tulafono. Ia pe o le aveese loa ma le tofi lena e i ai.

Ou te talitonu e sao e tatau ona i ai se isi avenue leaga e leai se taimi e fai ai mea ia. Ae o le mea e tatau ona tilotilo i ai o le taimi e tofia ai tagata nei. Ia e tatau ona fai se tulaga faapena.

O isi foi alaafaga, aua e tasi la nei Tulafono e toe silasila i ai, ae le i faamaoniaina le Tulafono lenei. Silasila i le faamamalu ia nonofo tamaitai i totonu o Fono a Alii ma Faipule. Aua o lea sau i i ia le Teuteuga lea, sits at the same village council. Ia o lona uiga la, afai la e discriminate i fafine, afai la e discriminate i fafine, o lona uiga e le mafai la ona alu le Komesina aumai se tamaitai, aua o o lea e le nofo i o, i lalo o le Tulafono ia lea, o so o se tagata e nofo i totonu i i, totonu o le village council. Ia ma le tagata lea e fia alu i le palota.

O nai mea na e tuu i ina e silasila i ai. Ae o le manatu maualuga o lenei sui usufono, e le tatau ona fai ni amendments faapea. Tatou toe foi lava i le Tulafono sa i ai i lalo o le General Elections. O le mea lea o bi-elections, e pei o se bi-product o le General Elections. Ia aua o lona uiga, e ia i tagata sa tatau ona le eligible, ae o lea o le a maua atu i i, ona o le suiga lea faatopetope.

Ia o le tala lenei i le afiafi lau Afioga i le Fofoga Fetalai, ia manuia lenei aso.

**FOFOGA FETALAI:** Faafetai, malo le saunoa i le sui usufono mamalu mai i Satupaitea. Ia na o si faamanatu lava, leaga o lea sa taua mai e le sui usufono mamalu ia mea ia o pre-sitting ina ia aua ne i toe afea i se saunoga, ona o lo o aiaia i tatou Tulafono tumau 32 (6), ina ne i te i ua o tatou manatu mama i tulaga ia, o lo o aiaia i tatou Tulafono Tumau mo le silafia e le mamalu o le Maota.

Ia o le taimi nei, ia tulai mai ia lau Afioga i le sui usufono mamalu o Gagaifomauga Nu.2. Vaele.

**Afioga VAELE PAIAAUA IONA PAIAAUA SEKUINI (Gagaifomauga Nu.2.):** Faafetai i lau Afioga i le Fofoga Fetalai ua maua se avanoa o lenei usugafono. E faaleo ai foi se lagona e tusa ai ma le Tulafono Tau Faaofi o Teuteuga Faiga Palota. E momoli le faafetai e auai foi le lagona o lenei usugafono i le taeao ua sola e ala i le tatou faasagi ma le faapolo i le Atua, ia aua le aumai pea o aao laveai o le Atua e taitaiina ai galuega a le Palemene nei.

Ia e faatalofa atu foi i le paia maualuga o le tatou Maota, susu i le Afioga i le Palemia faapea foi ia Minisita o le Kapeneta. Ia faatalofa atu foi i le Itu o le Maota, i le Afio mai o le Afioga i le Taitai o le Itu Agai faapea foi le Sui Taitai ma le mamalu o sui usufono mamalu uma o le Palemene ia ua ofaga nei i lenei taeao liugalua.

Ia e tulai atu foi e faaleo se lagona e tusa ai ma lenei Tulafono. E muamua ona momoli le faafetai tele i le Afioga i le Minisita e ou le Tulafono. E manatu o lenei Tulafono o se Teuteuga e pito sili ona taua i lou sui usufono. Ia o lo o manino ma malamalama i le amataga o le folasaga na aumai ai, o sini aoao o le Tulafono Tau Faaofi lenei, ia atagia ai ia suiga manaomia ma talafeagai, ina ia faailoa ai nisi o mataupu na laga mai i faaiuga o Faamasinoga aemaise foi o faaiuga o Faiga Palota ua tuanai atu.

E manatu o lea ua tele lava ina manino nisi o vaega e ala i nisi foi o sui usufono ua maea ona sausaunoa. Ia e ao pea ona faaleo se lagona i tulaga o monotaga e amata atu ai se manatu. I le vaai lava ia a lou sui usufono mai tua a o i ai foi i tua ae le i oo mai i le Maota, o lenei lava upu o le monotaga e talanoaina soo foi i totonu o faiganuu. Ia aemaise foi le faalogologo mai i totonu o le Maota lenei. O le tele o taimi e talanoaina ai lava suiga.

I le faaliliuina la e lenei usugafono le upu o le monotaga, o le tautua. A tau loa le tautua e aofia ai so o se ituaiga tautua, tautua faale-nuu, tautua faale-lotu. O lona uiga e agavaa uma tagata o le atunuu lenei i so o se ituaiga tautua e tautua ai i nuu ma afioaga aemaise o le itumalo. E i ai la le manatu, a vaavaai i le taimi ua alu ma le suiga sa i ai muamua, sa faaaogaina ai ia monotaga faale-lotu, lea sa tutulai mai ai nisi o sui usufono i le tu taulaga i le itu sasae ma le itu sisifo. O lea sa laugatasia uma ai tagatanuu uma o Samoa i lalo o le upu o le monotaga, ua aofia uma ai i totonu vaega ia.

Peitai o le suiga nei suiga e pei ona faaaoga i le taimi o palota lea ua alu, a matauina ai e pei e foliga ua le laugatasia ia tagatanuu uma o le tatou atunuu. O le a fai ma tala faataitai ia le matou pitonuu lea i Vaitele, o lea e vaavaai ma le faanoanoa i le toatele o tagatanuu o lo o aumau ai i i i le nofoaga lea i Vaitele, peitai ia o le nuu e tumaoti lea i Vaitele tai, ia e le toatele ia ni matai e auai ai. Masalo pe na o se 10% o le faitau aofai o le lola atoa o le itumalo lea, o lea e i i i Vaitele tai. Ae o le 90% po o le 80% o le faitau aofai o le itumalo lea, o lea e i i uma lava i uta i fanua umia saoloto. E pei o le vaai lena e le o laugatasia le aiatatau e ala i le upu lea o le tautua, e agavaa ai i tauva ai i totonu o le sui tauva pe a fia ulufale mai i totonu o le Maota lenei.

O le ala lea e fiafia ai foi le agaga, e toe faataua ia le monotaga faalelotu, ia agavaa uma i ai ia tagata tautua e faaaogaina ai le tautua faalelotu, i totonu o agavaa e mafai ai ona tauva i totonu o palota. Ia e pei o le vaega lena e pei o isi vaega ua manino lava i le vaavaai, aua o tua ia i nuu i tua, lea e matou te galulue ma tautua mai ai, e manino lava. E manino lava totonu o le tautua lea e aofia uma lava i totonu ia tautua nei e aofia ai ma le tautua faale-lotu.

Ae a i ai se matai e faatea mai i totonu o le nuu ma sau nofo i Apia, e manino lava ia le Tulafono. E le mafai ona tauva ia ituaiga matai i tofi faipule ma o lea foi ua i ai aiaiga aemaise foi o aulape e le mafai ai ona agavaa ia le tagata e auai i totonu o tauvaga lea o sui tauva o faiga palota.

Ia o le vaega lona lua e fia oo i ai se manatu, o le vaega lea o le palota muamua po o le pre polling. Sa vaai ma le faanoanoa e le atoa foi se... masalo e le atoa se 10,000 o tagata palota ia e agavaa i le palota muamua, ia ae 4 aso pe 5 aso lea na tuu i ai e le Tulafono e faatino ai ia le palota lenei muamua. O le faanoanoaga ona e tasi le aso na tuu i ai e le Tulafono, i le aofaiga e 100,000+ o tagata lea na taumafai i le aso e tasi. Ae 4 aso na tuu i le vaega lea palota muamua.

O le faafitauli na matua iloga ona aliali mai i le vaega lea, o isi aso e leai lava ni palota e maua i fale palota. Ae o isi fale palota, e tasi lava. Ae e lau mai, ua mautinoa lava le tagata lea e palota ai si loomatua po o se toeaina lea. O le faafitauli lena, ua le maua ai se fealofaniga i totonu o aiga.

O le tala faataitai o lou itumalo, 3 lava tagata na totoe i le isi pitonuu e tasi, ae leai uma lava isi pitonuu. Ae sau ia le faitauga o le palota lea, e tasi lava le sui tauva na palota uma i ai ia tagata nei e toatolu. O le popolega lena o lenei sui usufono, i le tele o aso e tuu i le vaega lea o palota muamua. Ae ua faafetai i le Minisita e ou le Tulafono, o lea ua tuu mai i lalo i le tasi le aso, ia i totonu lava o le vaiaso lea e fai ai ia le Palota tele.

O le isi vaega e fia oo i ai le manatu o lenei usugafono lau Afioga i le Fofoga Fetalai, o le vaega lea o fale palota. O le isi lea itu na matua matauina le faigata mo matou nei i Savaii. A silasila i ai i luga o le uafu i le aso o le a oo i le faiga palota, ia ou te le iloa lava pe i ai se isi tumu

e oo ma le faigata lea. Ae ou te iloa o i na tele na sui ai finagalo o nisi aupalota. Afai o le tagata palota sa fia palota i sui o le la Itu, ia na toe liliu mai lava i le Itu lenei.

O le popolega na o lea na i ai, e le gata i le taugata, ae faigata foi ia le feoaiga, ia ae o le tulaga lena, ua le mafai ai ona maua se nofo lelei o nai tagata.

O le isi mea e fia faailoa i lau Afioga i le Fofoga Fetalai, o le toatele o nisi nei e i totonu o le lola ia o latou suafa palota e palota ai i Savaii, e leai ni galuega. E fesulufai solo e sue se pasese e alu ai i Savaii leaga o lea e faalala atu ia le \$2,000 lea e faasala pe a le alu e palota. Ia o ituaiga lagona na matua vaaia le faigata ma le pagatia o sui aemaise lava lo matou itumalo lea ua o matou molimauina le faigata. Ae faafetai i le Afioga i le Minisita, ua tafa lona finagalo e vave ona toe fai suiga nei, ina ia faigofie ona faatino isi faiga palota ia e loloma nei.

Ia o le tulaga i vaega ia e tele ina mumusu tamatai ma sui o nuu, ia e faafetai o lea ua faaopoopo le isi tagata lea e mafai ona sulu i ai ia le tagata tauva. Aua o le tulaga lava lea i le vaai, e matauina ma le faanoanoa i le Faiga Palota ua mavae, o nisi lava afioaga ua mumusu uma ia sui tamatai ma sui o le nuu, ona e i ai tulaga e alo i ai le vaega ia. Ae faafetai o lea ua maua se isi tagata e mafai ona aumai sao lava i totonu o faalapotopotoga nei po o Pule a Alii ma Faipule, ia mafai ona o latou faamaoniaina ia sui nei, o lo o agavaa lava e tauva i le Faiga Palota.

Ia ma le isi vaega lau Afioga i le Fofoga Fetalai, o le vaai ma le faanoanoa i nisi o sui sa faaulu o latou suafa e fia tauva i le Faiga Palota ua mavae, ae te i lava ua toe faaui i tua ia o latou suafa ma le Faiga Palota. O le vaavaai i le Tulafono Autu, e pei e tasi lava ia le vaega lea e faamamafa mai o se gasegase tuga ua le mafai ona tauva ai. Ia ae faanoanoa lava pei a manuia loa ia le Faamasinoga, ia ona saoloto lava lea o le tagata e leai se aiatatau e mafai ona taofia pe toe tauva.

O le mea lea e toe tuu atu pea i le Afioga i le Minisita, pe ua le tatau ona i ai ma se faasalaga i le tagata lea ua faaulu faaulu ia le suafa e fia tauva, ia ae e pei ua faamalieina loa le manatu, lona finagalo i le mea sa finagalo i ai, ia ona tuu lava lea e leai se faasalaga e tuuina i ai. E pei o le lagona lena e lagona ai e lenei itumalo le agaga faafetai.

O nai manatu ia lau Afioga i le Fofoga Fetalai, e fia faailoa pea i le paia o le tatou Maota, ia e lagolago e lenei itumalo ia le suiga o lenei Tulafono ua Tau Faaofi, mo suiga o le tatou Faiga Palota. Ia, ma le agaga faaaloalo faafetai.

**FOFOGA FETALAI:** Faafetai mo le sao foi o le sui usufono mamalu mai i Gagaifomauga Nu.2. Ia faafetai o lea ua maua lou finagalo, ia o lea ua tulai mai ia le sui usufono o Faleata Nu.3. ia Lealailepule Rimoni Aiafi, ia o lou avanoa lenei.

**Tofa LEALAILEPULE RIMONI AIAFI (Faleata Nu.3):** Faafetai i lau Afioga i le Fofoga o le Fono, faafetai foi i le Afioga i le Minisita ma le Matagaluega e tusa ai ma tatou Tulafono.

O le tele foi o vaega ua uma ona saunoa i ai ia nisi o sui usufono, ae o nai vaega ia lau Afioga e fia... e tatau lava ona oo i ai se faamatalaga, ia e pei o lea na taua le mea lea... o le tatou Paeaiga lenei lau Afioga, faafaigofie i lou talitonuga, e tasi lava le pepa suega lea na o tatou sue mai ai.

O le vaega la lea o le a fai nei ia le latou Palota Laiti, o vaega o i latou o lea o le a omai i le tatou Paeaiga lenei e tasi. E le ese se Paeaiga e o i ai. O lona uiga, e tatau foi ona sue lava i le pepa suega lea e tasi lau Afioga. Afai la ua sui le pepa suega. O lona uiga, o le a taumate, pe faigofie, pe faigata, ona le fetau lea ma latou lea e omai. Ae tasi lava le Paeaiga lea e tatou te i ai nei.

Ua le ese le mea lea ma le laufali lea sa faia le matou taaloga i le Apia Paka, ua uma le taaloga ma omai i tua ua matua faitio tagata i le leaga o le faiga o le taaloga e le laufali. Ae fai mai le laufali, ou te ofo i le tou feita, ae o lea na matua unfair lava ia le faiga o le taaloga, fai atu ai foi. Ae o nai manatu leaga e tutusa le Paeaiga lenei.

O le Tulafono lenei o Faiga Palota, o lea e tatou te silafia e tatou ua fai si leva i inei, leaga le Tulafono e sui soo lau Afioga. Sui, sui, sui. E le faapea foi o suiga uma e tatou te fiafia i ai, e oo foi i ai tatou sa i le Malo foi tatou, e i ai foi ia suiga e matou te le fiafia i ai, leaga e eseese uma lava manatu, eseese ia itumalo, eseese finagalo o tagata i nei mea. E tele foi o tatou e manatu faapito lava tatou i ai tatou, ae le manatu i le lautele i faiga e talafeagai ma taga tutusa uma mo le atunuu.

O le mea la sa i ai le manatu, aua ou te talitonu, e mautinoa foi e fai se Komiti Suesue mo... e tatou te tilotilo i ai i vaivaiga ma ni faaletonu o le Palota talu ai, ona taumafai lea e sui mo le isi Faiga Palota. Ia ae lea la ua i ai ia suiga tetele nei, e pei ona saunoa ia le Palemia, o lenei mea o le faa foi lea o le faavave o le faiga o Tulafono e le o se mea fou. Peitai, afai ua sui atoa ai lava se aano o se Tulafono, ona ou popole lea. O suiga ia e aumai i i, e le gata e 9 suiga, ae i lou talitonuga o le a sui atoa ai le essence, le aano na ala ai ona faavae le tulafono lea o le qualification, pe o ou agavaa e avea ai oe ma sui tauva i lou lea talitonuga.

E muamua, o le mea lea e tulai mai i tausaga faipea, o au lava ia ou te alu e fai lou manatu i Komisi suesue ia. O lou manatu sa fai i le Komisi suesue talu ai nei, e le tatau ona toe faia se Komisi mai tua, lea e omai ai le toatele o tatou ia sa o i le palota le manuia, ma nisi o sui matutua. O le uiga o lau faamatalaga, a fai le suesuega a le vaega lea atoa le tausaga o fai, e toe foi mai lava i le Komiti faa-Palemene. E fai foi lea o suesuega a le Komiti faa-Palemene ia i le isi tausaga, e oo mai suiga tetele nei o le a fai le isi palota. E le mafai e tatou ona lava le taimi e absorb ai, tatou te malamalama uma ai i suiga nei.

O lou talitonuga e tatau ona lava le Komiti faa-Palemene. O tatou nei o lea e fresh o tatou mafaufau o lea e lata mai lava le tatou malamalama i le palota lea na uma atu nei. Ma tatou tilotilo i mea nei, ma toe fetuunai mo le palota o lea sau nei.

E i ai suiga ia e talafeagai lelei, a o lou talitonuga, sa tatau ona tapena lelei mo le isi faiga palota.

Na saunoa le Minisita o Faatoaga e faapea o suiga nei, o nisi o suiga nei e mafua mai i faaiuga a le Faamasinoga, lea na fai mo le pre-qualification.

Lau Afioga i le Fofoga Fetalai, a tagai lelei i ai i le tatou Fono mulimuli. O le suiga mulimuli lea na pasia i le Paeaiga na tea nei. Suiga ia na tatou faia i le Palemene na tea nei, e address ai, e faamautuina ai pe faasao ai nisi o iuga a le faamasinoga. O lea na tatou faia suiga nei. E pei o le 3 tausaga. E manatu le tulafono sa i ai, e le o manino tonu po o ai le pulenuu e sainia le pepa. O lea la e tusa lava pe saina e le pulenuu ua 20 tausaga e le o toe pulenuu, lea na faaoga e le tulafono. O lea na toe sui e le Faigamalo i le Paeaiga mulimuli na tea atu. O lea na faamanino ai, e na o le pulenuu, current pulenuu. E tuu ai i totonu le current pulenuu, ma le mea lea o le monotaga. O lea na fai mai le faaiuga a le faamasinoga, so o se monotaga e 3 tausaga e fia sefulu tausaga talu ai, a o lea na toe faasao atu e tatou. Ona o le intention na fai ai, o le agaga na fai ai le tulafono i le Palemene, i le 3 tausaga lea, fai ai loa ma le palota.

Aua o le mea moni lau Afioga, o le palota lea na fai nei, e i ai sui sa o i le palota,ua tetea ma nuu. E i ai sui ua o i le palota, e le o toe nofo i se fonotaga a se nuu, e le o toe faia ni mea faalenuu. Ae o le auga atoa na tusi ai le tatou tulafono, o le tagata ia lava lona malamalama i le siosiomaga o le nuu, ma le itumalo. E le gata o la e nofo i le saofaiga a nuu, fai lona finagalo e taitai ai ma tapue ai le nuu, toe fai ma le monotaga. O le agaga tonu lava lea o le tulafono lea.

O lea e pei na tusaunoa ai se tasi o sui le afioga ia Vaele lea na uma atu nei, i le tulaga lea ia latou i Vaitele. E leai ua uma foi lona taimi. O le mea lona e ave i le Komiti, pe a toe fai le Komisi tele i le isi palota. Ave i ai outou finagalo, e le o se mea fou ua leva ona tatou talanoa mai ai. Aua afai e matai mai Savaii ae sau tautua lotu i i, ae le tautua i Savaii i le mea o la e nofo ai ma matai ai, e faigata. O le isi mea, aua e le nofo au iinei, aua a tatala loa le mea lea, ua mafai foi e au ona alu i o, ma tauva ma Vaele i o, pe a fai o la ou te nofo ai i o. O le a le matagofie e tu mai le Gagaifomauga po o le Gagaemauga fai mai, tu mai Lealailepule matai Faleata lea ua faipule mai o. O mea na e tatau ona tatou malamalama ai, ne i te i ua faapea, o le tulafono e faatagafai, o le tulafono na o nisi.

A o tulaga i nai suiga nei, sa tatou pasia mulimuli lava. O le mea lea e popole ai le taofi lau afioga, o le auga atoa a alii ma faipule o nuu, ia e nofo i totonu o le fono.

O le monotaga, e na o le nuu lava e faaaoga i mea tau o le monotaga. E le o se monotaga ni mea faale-lotu. O na e malamalama lelei le toatele o sui usufono. O le lotu o le tautua. A o le mea lava e patino i mea faale-nuu, o le monotaga. O le monotaga foi, pei o le obligation, o le mea e faamalosi, e faamalosi i totonu o nuu. E le faapea e faamalosi e ave ai oe e falepuipui. E mafai ona faatea oe e le nuu pe afai e te matai ae te le usitaia mea e fai a le nuu. I lou talitonuga e leai se sootaga a le monotaga, ma mea faaletonu. E le o se monotaga mea faale-lotu o le tautua. O le tautua, i lou loto malie. A o lou foi talitonuga i mea nei o mea faale-lotu, o le matai o la e fai lana monotaga i le nuu, e okometi lava lana tautua i le lotu. E le o ese mea e 2 e pei ona ou talanoa atu ai i lau lauga i le amataga o le Paeaiga lenei. O le temokalasi lenei a Samoa, e o faatasi le aganuu ma le ekalesia.

Sa ou faapea la, aumai i totonu e le gata e fai lana monotaga o le nuu, ae aumai ma le faamaoniga o lenei e te lotu. O lenei e te lotu i totonu o le nuu. Aua e talu ona tatou feola mai, e tatou te feoti foi lava, e leai lava se Samoa e loka i se mea faale-lotu. Ua le faia se mea faale-lotu pe ua faatea ma se lotu. A fai na o lau lotu lava i le olaga atoa e leai sau mea faale-lotu e faia, e le faasaina lea mea.

Ae o le nuu la, afai ua e matai, o lau matafaioi o oe o le matai e fai au mea faale-nuu, ae ia e nofo i totonu o le siosiomaga lea i le 3 tausaga. O le mea lea o le a popole ai, o le mea lea e tupu ia tatou, o matou foi e matai i Savaii, matai i tua, e na o le o atu lava fai matai omai nonofo i le taulaga. Ona o lea foi e matai i nuu i nei. A o le mea lenei o le a tupu, o lona uiga na ona atu lava i tua pe 2 lotu i le tausaga. Fai lana mea faale-lotu ona alu ai lea. E le o se faipule o se lotu, e le o se faipule o se aiga, po o se faipule o se nuu, o le faipule o le itumalo atoa. E tataua ona malamalama e le gata i mea faale-nuu, o mea a le itumalo. O le mea lenei e tataua ona toe tagai i ai lau afioga i le Minisita.

E le faapea e tetee uma i lau tulafono. Ae muamua sa tataua ona toe tagai lelei, po o le a le mea ua faatopetope ai i le palota laititi. Ae le taatia toe sutesue lelei ma vailili mo le palota tele o lumanai nei.

O le isi vaega lau afioga, o le suiga lea e i ai nei i tagata e fia matai. O lea e sau nei, o lona uiga e mafai ona e matai i le masina na tea nei. Afai o lea na e matai nei ia Iuni, Iulai, ua mafai ona e alu i le bi election lea o le a fai nei, po o Aokuso. E talafeagai lea mea? O le a la le monotaga lea o le a faaaoga e le matai lea, a o lea faatoa matai. O lea e le i saofai i se fonofono a se nuu? Pe faatoa tasi le fonofono e saofai ai, a o lea o le a alu i le palota nei i le palota laititi. Aua o le mea lea o lea na tatou faia faatasi ai. E oo foi i le mea lea na laga mai e nisi o sui lea na mavae atu nei, e palota i palota ia. E tele lava finagalo na femoumouai i le vaega lea. E fai ma le le faia.

O le mea sa i ai talu ai lau afioga, o le palota talu ai, pe te nofo lava i Vaitele ae te palota i Manono po o fea lava le itumalo, e te alu atu lava i Vaitele fai ai lau palota. Sa tatala faasoloatoa, lea na uma ane, pe 2 vaiaso o taumafai e fai results o iuga o palota ona ua taape solo iuga o

palota. Lea la na tatou toe suia ai le mea fou lea ua i ai. E leai ni mea fou lau afioga, o mea e taamilomilo lava mea, a o mea na tatou faia muamua e le work, toe fai, toe fai, e i ai foi suiga nei. A o le mea lea i fale palota, ae ia outou mautinoa lelei, o le manaia foi le mea lea ua i ai. O la e atagaia tonu ai lava le tagata o la e nofo ma tautua i le nuu. Aua o le palota i le tele o palota na uma atu, e palota mai Savaii, ae uma ae ua malo atu i le fale palota i Upolu. E tele sui faapena mai Paeaiga. O le mea lea e tatau ona toe tilotilo i ai. Aua o suiga na tatou faia foi ma le mafuaaga....

**Susuga Hon Laauli Leuatea Polataivao Fosi:** Lau Afioga i le Fofoga Fetalai, o se mea e fia faamalamalama.

**FOFOGA FETALAI:** Ia fai mai sina malologa a le sui mamalu.

**Susuga Hon Laauli Leuatea Polataivao Fosi:** E leai se agaga e faalavelave i le tulai mai o le sui usufono manaia lona suti, aulelei foi i lenei taeao.

O le mataupu lea e saunoa i ai le sui i le teuteuga lea ua fai e le Malo. O se faamama avega lea mo Salafai. E tautala au sa fai lau bi-election i le nofoaiga lea na uma nei. A fai e 500 sui o lou itumalo lea e i Upolu, o le 500 lona na lau i Savaii. O lona ua outou silasila i ai, o le tau faae lona lau afioga i luga o le Fofoga Fetalai ia matou la e i Savaii. Ua uma lau bi-election ua ou toe fau fai le general election. Ia o le amoga faalua lona o le amoga lea na fai. E leai ma se mea na afaina ai Upolu, aua o Leala ia e savalivali atu lava i Faleata togi le palota toe sau i fafo. E faigofie ia i latou lea e nonofo i Upolu, a o Savaii lava ia, oka, e oso i le pasi, oso i le vaa, toe oso i le pasi, 3, 4 aso o alu faatoa taunuu mai, foi mai le faiga palota. E te le alualu fua. E te alu ma ave lou oso ma ave le meaai i le aiga. E le i lalo ifo o le \$100 le tupe, e faaagaga mo le sui taitoatasi.

O le mea lona lua, suiga ia e saunoa i ai le sui o mea faatopetope, e le o se mea fou. A vaai le Malo i tulaga o mea ua tatau ona sui, sui. O suiga mulimuli lava lea ou te uua i lou lima i le taimi lenei, o suiga faatopetope i le aso 3 Mati, ae Aperila le palota. O suiga fou lea.

E toetititi lava 20 suiga fou ia na toe tatope lava o le a ta le taimi o le faiga palota. O le mea la lea malilie sui usufono, ua vaai le Faigamalo i le tele o mea na aliae mai i le faamasinoga, ma le tele o mea na faaletonu, lea e mafua ai, na o le...6..7..suiga ia e taumafai atu. Ina ia malu.

O le isi suiga tele lea sa tatau ona tatou mataitu i ai, o le faamamaina o lola. O lea e agai i ai le matou mau i le taimi lenei i le mea lona. O le mau lea e aumai... tulou lava o le a tau atu pea le tulaga i itumalo, ia fai i ai a matou suesuega.

O le mau lea e aumai e le itu Aana 2, e le i lalo ifo o le 500 tagata la e totonu o le lola e le o ni tagata Aana. E faapena Falealupo, e le i lalo ifo o le 200 e le o ni tagata Falealupo. O ai e faia le mea lea?

E na ona tuu atu i tafatafa o le afioga i le Minisita se i silasila i ai e le o ni tagata o se itumalo, a o la e i totonu o le lola o la na filifilia le itumalo.

O le agaga lena lau afioga i le Fofoga Fetalai, ua ou manatu e tatau ona avatu. Ma le agaga faaaloalo.

**FOFOGA FETALAI:** O lea ua maua le finagalo o lau afioga i le Minisita o Faatoaga ma Faigafaiva. Ou te talitonu le sui mamalu o Faleata Nu 3, o lea ua maua tonu lava le mea sa laga e sui mamalu.

**Tofa LEALAILEPULE RIMONI AIAFI:** Ou te sau loa i le taeao ou vaai po o a laei o lou uso la e fai. Ae ou te manao lava counterpart ai pe ...faafetai uso, thank you. You also look lovely as always. O sui nei e saunoa i ai le Minisita, e sao. A lea na fai atu matou, o suiga ia na matou faia, e le i faaaogaina suiga ia i le palota laititi. E lei faaaogaina. O lea na fai mo le palota tele i le lumanai. Aisea? Aua ua uma pre-qualification, ua uma faamasinoga e le mafai ona toe faaulu ni sui fou. O suiga la ia na matou faia i le taimi lea, fai fuafua mo le isi palota. E le i faia mo le palota lenei.

E manatua foi le taimi lena, o taimi lena o lea matou te fono atu iinei, ae o la e, Samoa, le taimi lena le FAST, le tou roadshow. O le taimi tonu lava lea na fai ai le mea lea lau afioga.

**FOFOGA FETALAI:** See ese ma le mea lea, ae faaauau le saunoaga.

**Tofa LEALAILEPULE RIMONI AIAFI:** Aua a na faapea e i i, i le taimi lea, o le taimi lea sa tatau ai ona faaofi suiga nei.

**FOFOGA FETALAI:** Onosai mai le sui mamalu se i tuu atu le avanoa i le Palemia.

**Afioga Hon Fiamē Naomi Mataafa:** E pau lava le mataupu e fia faasoa, o le saunoaga a le sui faapea, o suiga ia na fai mulimuli o le a fai le faiga palota mo le palota tele e sooo ai, pe ua galo i le sui o la e manino o suiga ia na fai, e faamoemoe mo ni mea e ono tutupu mai i palota laiti pe a uma le faiga palota tele. O le sao lena o le tou suiga lea na fai pe afai ua e le manatua.

**FOFOGA FETALAI:** Ou te iloa o lea ua maua mai e lau afioga i le sui mamalu.

**Tofa LEALAILEPULE RIMONI AIAFI:** O suiga na o lea e i ai nei, na o le mea lea o le pulenuu. E le ni major changes e sui atoa le essence o le tulafono. Ae manatua, sa leai ni manatu e i ai ni palota laiti. Ae o lea ua uma ane na matou lea e maua ai, ae le afaina. O mea e tatau ona tagai i ai. Ona oo mai lea i faasalaga o sui ia ua pauu i le palota. E mai lava i le amataga o lea e manatua e sui matutua. A fai se petition ia oe ae e pau, e na ona e pau lava uma le faamasinoga e sau toe alu i bi-election, sui mai isi faiga fou sui mai, o lea ua oo lava i le taimi lenei ua le mafai ona alu. Ua le gata ina e pau i le palota lenei, e le mafai ona toe alu i le isi palota. I ai lou talitonuga e toe Iloilo, toe tagai i ai le Malo ma tatou uma lava. E fai fuafua foi i nai faipule ma tagata, e le faigofie lenei mea. Ua faasala faafia nai tagata, ua pei oni fasioti tagata. A o nai isi faipule, na o le tai \$20, \$50, mea masani lava. A o faasalaga e pei ua tetele tele, ae toe tagatagai mo le agai i luma. Ae ou te talitonu, e na o ni manatu lava e...o lona ua i ina, ae tatau ona tilotilo ma tagatagai, a tatou faia tulafono. O tulafono e le gata mo outou a o tatou uma. Aua e i ai le isi finagalo lea sa ou maua e faapea, o matou e le faia ni o matou manatu i paketi ma matou tulafono, i le taimi o matou i le Malo. E leai o lea e silafia e sui uma ia na omai. E le faapena le faiga o matou, e faaali lava le manatu o le tagata ia i lona talitonuga, e fau faatasi ai tulafono. E le se tulafono mo le tagata mo se nuu mo se itumalo, a o le tulafono mo Samoa atoa.

Lau Afioga i le Minisita, o nai manatu na e fesoasoani mo lau tulafono ua tulai mai, ae o mea faale-lotu tuufaatasi ma le monotaga, o lou alu i le lotu. E le mafai ona tuueseina, ua lava na o mea faale-lotu e te alu ai i se palota. E leai, o le palota o le mea mo le itumalo atoa a le tagata e fai lana monotaga ma toe fai lana tautua.

**Susuga Hon Laauli Leuatea Polataivao Fosi:** Ou te fia malamalama lau Afioga i le Fofoga Fetalai, ae faapefea le ituaiga sui foi lea e le fai nuu e faasa ona alu atu i le nuu, e le talia e le faiganuu. Ae pau lea o le auala e mafai ona alu ai i le palota. E i ai isi nuu ia i totonu o tatou atunuu ua i ai le mea lona. E le faatagaina ma e le faasaina foi i totonu o le faiganuu. Ae pau lea o le auala e mafai ai ona alu i le palota, o si ana monotaga i le ekalesia.

O le upu foi lea lau afioga, ia tulou lava. E le mafai ona tatou vavaea le mea lea o le tautu faale-ekalesia. O le tautua faale-ekalesia o le tautua e tatau ona fai. Ma e leai se matai Samoa, e le tualuga pe aua lona faamoemoe e tautua le nuu toe tautua le ekalesia. O lau fesili lona i le sui mamalu, pe o le a sana...ma lou faaaloalo.

**Afioga Lupematasila Galumalemana Tologata Togia Tile Leia (Falelatai ma Samatau):** Lau afioga i le Fofoga Fetalai,

**FOFOGA FETALAI:** O ai e te faauilavea i ai.

**Afioga Lupematasila Galumalemana Tologata Togia Tile Leia:** O le mea e fia faasao

**FOFOGA FETALAI:** E leai, e leai sou avanoa e te faasaoa ai le faauilavea.

**Afioga Lupematasila Galumalemana Tologata Togia Tile Leia:** O le mea e fia faamalamalama.

**FOFOGA FETALAI:** E leai, e leai sou avanoa e te faauilavea ai i le faauilavea.

Saunoa mai le sui mamalu o Faleata Nu 3.

**Tofa LEALAILEPULE RIMONI AIAFI:** E leai se isi o tatou e tetee i le tautua faale-lotu. Na ou talanoa atu i le amataga o lau lauga, sa tatau ona aumai i totonu e faamalosi, e le gata o le monotaga faale-nuu a ia e alu i se lotu. O oe o le tagata lotu. O le mea lea e saunoa i ai le Minisita, e sao e i ai itumalo faapena. O le vaega lena a le Lands & Titles Court, le fale faamasino. A fai e taofi mai e le nuu, e mafai ona avatu le poloaiga...e iai mea faapena na tutupu. E i ai nisi o sui tauva na faatea e le nuu, ae aumai i le tulafono, na ala ona le faia le monotaga a le sui lena, ona o lena e tetee i le tou nuu. O la e faatea e le tou nuu, a o le matai ua leva ona tatau ona toe foi i le nuu, e qualify ai e alu i le palota lea na alu ai. E ese le palota lea tatou a o palota i tua atu, pe 2 palota talu ai.

Ua lava foi lea lau afioga, ua lava. Faafetai i le Minisita o Faatoaga lou fesoasoani mai i le Minisita o Faamasinoga.

**FOFOGA FETALAI:** Malo faafetai i le sui mamalu o Faleata Nu 3, malo saunoa.

Tulai mai le sui mamalu mai Anoamaa Nu 1.

**Afioga ALAIASA MOEFAAUOUO MALAIGATUTOGIAI SEPULONA MOANANU (Anoamaa 1):** E faafetai mo le avanoa i lau afioga le Fofoga Fetalai. E manatu o lea ua uma ona paepaeulufanua sa ma faigata o le tatou Maota aemaise Samoa i le itula ua sola. Matou te talitonu o paia ma sa e le toe taufaamapueina i sa matou faamatalaga e tumau lava e oo i le faavavau.

E faafetai i le taitaiga a lau afioga, o lea foi ua tuanai atu futia na tatou alafaiva aua le tala o le tupe, sa faaaaogagase ai le Maota. O lea ua sologa lelei mea uma i le alofa o le Atua.

Ae le fia nofonofoloa foi lenei itumalo ona o lenei Tulafono ua faataatia i le Maota. E faafetai i le afioga i le Minisita mo le Tulafono e toe teuteu. O lea e tau vaai atu i le agaga o le Tulafono. E i ai lava le upu o le Tusi Paia, “o le e iloa le mea e tatau ona fai, ae le faia, o le agasala le mea lena.”ae o lea ua aumai loa i i, i le Tulafono.

O le faafofoga a le matou itumalo, lau afioga sei tulou, ona o lea sa ou maua i le taimi o suesuega. O le mea lea e taua ai tele le Tulafono lea o le palota. Sa ou i ai i le faamasinoga lata mai, e i ai la le tala lea, “e na o lou itumalo lava e mafai ona toe aveesea lou tofi.” Pei la o i, ou te iloa ai, e ese le taua, e ese le taua o Tulafono tau palota i so o se sui usufono. E leaga e aafia loa lona itumalo, lea ua aumai e le faamasinoga le tala lea, e ese le faataua i ate au. E le mafai e se tagata ona aveesea na o le itumalo lava. O mea la lea e agai i ai a tatou Tulafono, o tapenaga o itumalo.

Silasila foi lau afioga, e eseese uma lava agaifanua ma aga a nuu ma itumalo. E leaga o lea o le a aumai nei le Tulafono, o le a taumafai e ta i se taga e tasi, ma ta faatasi ia le atunuu atoa. Ae oo lava i le sailiga o tofi leaga o tofi mamalu o itumalo. E eseese uma lava le filifiliina o tatou e o tatou itumalo. E le tutusa, e le tutusa, o le ala lea e ese le taua ia te au ia o le tatou aganuu. E leaga o lea e aumai i i. E pau foi lenei o le atunuu o Samoa, e ese mamao mai lava i temokalasi a isi atunuu. E leaga a le faia oe ma matai, faafetai ua tulou futia ua alu ma taimi ua sola, sa tatou mafuta ai ma e le matai. A o lea ua tatai lava ma alu alu lava, taaviliga o le au, lea ua tasi le tofa, na o matai e saofafai i le Maota o Samoa, e na o matai. O isi atunuu, e te 21 loa ua e agavaa e te alu i le palota, ua e agavaa e te tulai mai i le sui, aveae oe ma sui tauva. A o Samoa e ese le manaia o le mea lea e i ai tatou.

O le mea foi lea e tataua ona tatou omai ai tatou ia o matai, liolio le aganuu. E tataua ona aumai finagalo e toe matimati ma toe faamautu lo tatou agaifanua, aemaise tulaga o monotaga. O lea ua saunoa isi sui, pau a lea o le matou tuutuualalo, e le taitai ona tutusa isi itumalo... o le faataitaiga o Vaitele, o Faleata. E le taitai ona tutusa ma o matou itumalo i tua, e mapo ma faapena ona tautu i tulaga faale-aganuu e filifilia ai o tatou sui.

Sa ou taua i lau lauga faalauaitete lau afioga.

**Tofa Lealailepule Rimoni Aiafi:** Lau Afioga i le Fofoga Fetalai, e le gata ina sese, ae o le a ou lavea atu ai i luma o le sui.

Lau afioga o la e mapo a pulega a si ou nuu. A na o le pau lea o le itumalo lea na leai se palota. O i ina e atagia ai le nuu o la e lelei le tofa ma loloto le faautaga. E faamalulu atu lava Vaele ma tatou uso ma tuafafine o tatou mafuta ai nei i lo tatou nuu, la ou te lauga atu, a i ai se mea tou te finagalo ai, o la ou te nofo i Vaitele. Ou te fainuu i Vaitele tai, ae ou te nofo i Vaitele uta, i mea tou te i ai. Ae tatala e leai se pa, leai ni taifau, vae ane. E na ona outou o atu lava tatala mai, alu atu, o le a le mea tou te finagalo i ai, faafetai. Lau afioga i le sui mamalu, si ou uso mai Anoamaa, o le matua maopoopo lava o lenei nuu. O la ua fai mai, e te toe alu foi i le isi palota lea, e leai sau palota. Faafetai lava.

**FOFOGA FETALAI:** E taua foi le faauilavea a le sui mamalu o Faleata Nu 3. E fesoasoani ai foi i sui mamalu, e faapena, ia aloaia pea o tatou itumalo palota.

Faaauau le saunoaga a le sui mamalu.

**Afioga ALAIASA MOEFAAUOUO MALAGAITUTOGIAI SEPULONA MOANANU:** Ou te muamua ona faamalulu i le sui, ona o lea sa ou mulimulitai i faataitaiga na aumai i o i le isi sui lea o lo o nofo i Vaitele. Aua o le mea e tutusa ai maua ma le sui lea, ma te nonofo uma lava i Vaitele. O le ala la lea o lea ma te naunau atu ai, ia fai se suiga i Vaitele.

Ae sa ou taua i lau lauga faalauaitete tatou palota. E fai o le taugata, a o upu ia na faaaoga, faigata, taugata, mataga. O le taugata lea, lea ua aumai i i, i le Tulafono, aua e le gata ina taugata mo le Malo, ae taugata foi mo tagata lautele, ma sui. O lea ua i ai le suiga lea, e tasi le aso mo pre polling. Ou te lagolagoina foi lenei mea e tasi le aso. Aua a 3, 4 aso, e te vaai i le feoai o taavale, o le aufaigaluega, e tele tupe e alu a lo tatou Malo i le tau faafeiloai ai tau o mea ia. A o lea ua manaia.

O le isi mea lea o Savaii o lea ua taua e isi sui, taugata. E le faapea e taugata mo au, ae ou te vaai lautele, e tele le tupe o le a faasoina ona o mea ia.

Lau Afioga i le Fofoga Fetalai, ou te manatu i le tulaga o le tatou faiga palota lea o le a alu nei, palota laititi. O lea foi ua taua e nisi o sui, sa ou faapea tatou te toe tolotolo malie le mea lea, sei uma le faiga palota laititi ona faaaoga lea.

E na o se matou tuualalo ae le fai ai. E pau lava o lea e i ai le matou sui lea e toafitu (7) lau afioga. E pau lava lea o si au faaoololomaau i lau afioga. E a pe a e malie, faatauto nai uso ia i se taimi lata mai pe a tusa ai ma lou finagalo. Ona toe o ai loa e fai faiga palota. O lea o le a tatou toe tutulia, ae le i i ai se faiga aloaia e faapea ua aveia ma sui o le Palemene.

O le matou tala lea ma le agaga faaaloalo.

**Afioga Hon Fiamē Naomi Mataafa:** Lau Afioga i le Fofoga Fetalai, o le mea e fia faasao. E matauina lava e saunoa mai pea o sui o le Itu Agai i le toafitu (7) lea e aumai e faatauto. A lea sa fai le tou mataupu i le faamasinoga, e talosagaina ai le faamasinoga mo le tou faatautoga, na ave uma ai ma suafa o sui ia e toafitu (7), aepeitai na outou toe aveesea suafa o le toafitu (7) lea. Lau Afioga i le Fofoga Fetalai, a faapea ua aveese e i latou ia, a lea ua toe omai i lau afioga e fai le mea ua latou aveesea.

**Afioga ALAIASA MOEFAAUOUO MALAGAITUTOGIAI SEPULONA MOANANU:** Lau Afioga i le Fofoga Fetalai,

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, o le mea e fia faamalamalama. Ua fefoifoiai lava a tatou upu ia i, i le mea lea o le faatauto. A o le mea lena sa le tatau ona avea i se faamasinoga. Aua o le mea ia e fitoitonu ia i tatou. Ae ua ala ona ave i le faamasinoga, ona o le tulaga o le finau maumaututu o lena foi itu, e le faatautoa matou. O le mea lena na ala ai ona ave, ae i ai lava le taofi, a iai lava lau afioga ma le itu le tofa mamao. E faatino ai mea uma ia.

**FOFOGA FETALAI:** O lea ua maua le finagalo, ia outou foi sui mamalu. O lea ua faaii mai lau saunoaga. E talitonu lava tatou te le toe tepa i tua i atuvasa foi ua tuanai. O lea ua tatou alo lo tatou sa mo le lumanai.

**Afioga ALAIASA MOEFAAUOUO MALAGAITUTOGIAI SEPULONA MOANANU:** O lea ua saunoa atu le Taitai, a o upu lava a Samoa, e le au le pule ao i le pule po. E le au foi le pule po i le pule ao. O le aso ma le filiga o le aso foi e aumai ai e le Atua. E faamalulu atu foi pe a fai ua ui sao atu sau talosaga i lau afioga. Aua o lea ou te iloa, e na o lau afioga e ou le pule e fai ai le mea le la. Ou te le o tagi au ia i totonu o le Maota, ae sului sao lava le mata o le niu i lau afioga, o le pule aoao i le Maota lenei. Ou te le tau faa...o le mea foi lea i le faamasinoga, o lea ua ou mafaufau e toe aumai i tua le toafitu (7) e i ai se taimi, pe a fai e le talia lau afioga, ona toe ave lea. E i ai se taimi ona ou alu lea e ave. Ae na ala ona ou musu e ave, ne i te i ua aafia atu ai le 18 lea na o muamua. Ae afai o lou finagalo lea, na ona ou tuu atu faapena. Ae afai e te le talia, o le a toe oo foi la i o le mea.

O le taualuga so o se faiga palota, o oe e fai lau monotaga, o oe e te mafuta i le nuu. O oe e te i ai i fonu a nuu ma saofaiga. E te i ai i totonu o le ekalesia, tou te militino ma tagata o le ekalesia. A fai ni suegatupe e te auai, mea uma faapena. A e la e nofonofo le tagata faatoa alu atu e lesitala ma le tagatupe e alu atu mulimuli, o i tatou te vaai ai i le mea lea e tupu, o le reality lena o le mea lea e tupu. O le oa, e faafeagai ma le mafutaga lenei e lima tausaga o mea ia e tatau ona tatou liolio i ai. Aua a lesitala nei lou matai e alu atu nei, o lea lava tatou te vaai i tagata, se e tuli solo taavale a sui. Ou te le manao e faatasina le atunuu lenei i mea faapena, a o i e mafua ai le tulafono e avatu e faasao ai mea na.

Lau Afioga i le Minisita na ona lafo atu i ou autafa, e fai ai le tofa a lau afioga.

O se manatu lena o Anoamaa i lau afioga i lenei vaega o le aso. Ia alofa mai le Atua i le tatou fonotaga, ia aualiitia pea e Lona Agaga Paia lau Afioga, ia faapea foi le la Itu i le Afioga i le Palemia ma le Kapeneta, manuia foi lenei Itu. Ia soifua ma ia manuia.

**FOFOGA FETALAI:** Malo faafetai malo saunoa o lea ua maua lou finagalo ma ua... Ia, o lea e matau atu o lea ua tulai mai le sui usufono mamalu mo Salega 1.

**Afioga FEPULEAI FAASAVALU FAIMATA SUA (Salega 1):** Faafetai i le avanoa i lau Afioga i le Fofoga Fetalai, o lea foi ua tele lava ina faaali foi finagalo ma manatu e tusa ai ma le Tulafono Tau Faaofi aua foi le faiga palota. Ae momoli lau faafetai tele ma le agaga meeme e i le Afioga i le Minisita e ana le Tulafono ua mafai foi ona lagalaga ni manatu faaopopo e matimati ai le faiga palota o lo o tapena ma sauniuni atu i ai le tatou atunuu. Ia e fagatonu lava le manatu po o se lagona o lenei usugafono i le monotaga lea faalelotu. E pei lava ona faailoa e nisi o sui usufono, e eseese lava le faauigaina o le monotaga. O nisi o Ekalesia e leai ni monotaga, ou te le iloa po o ai Ekalesia ia. Ae ou te lotu i se Ekalesia e fai le sefuluai, e fai foi monotaga a Ekalesia ia. O nisi o Ekalesia e leai ni sefuluai ae fai o latou peleti, ia po o le alofa. Ia o Ekalesia lava ia e fai monotaga. O le fiafiaga i lou sui usufono ua mafai ona aapa foi i le isi itu faaleagaga. O le tele foi o isi sui usufono e i ai le talitonuga e lilifa lava le agaga i le monotaga lea faalenuu. Ia o le mea sili ona taua, leaga o le faitotoa o le matai Samoa o totonu o lona aiga agai le nuu, nuu i le itumalo, itumalo i le faigamalo. Ia e tatau lava ona i ai se itu faaleagaga. E le gata i lana tautua i totonu o le afioaga, a o le tautua foi i totonu o le Ekalesia e ala i le monotaga faalelotu.

Ae ua ou fiafia ina ua faaali le itu lea, e i ai se tasi o itumalo sa i ai se sui tauva, e fai lana monotaga faalenuu i le nuu lea e matai ai, ae lotu tuusavali i le isi nuu e lotu ai. Ua ou fiafia la ua faaoga le monotaga lea ona ne i te i ua i ai se feeseeseaiga. Ae ua tau feteenai sou lagona, pei ona maua mai e le sui usufono, tulou le itumalo o Satupaitea, pe a faapea e matai i Satupaitea, ae lotu i Vailoa, ona feteenai lea o lagona ia.

A o lea ou te faitau atu i lalo pei ona ou faailo atu le agaga faafetai i le Afioga i le Minisita, o lea e faamalamalama lelei mai ai le Tulafono, o tagata e toa-3 lea e toatolu ai malosiga o le sainiga o le monotaga, o le tagata o lo o i totonu o le nuu o le afioaga lea o le a tauva mai ai le sui tauva. O lona uiga, a faapea o le failautusi o le Ekalesia, e tatau lava la i le failautusi o le Ekalesia i le nuu lea e tauva mai ai le sui tauva. O lona uiga la, e le agavaa se nuu i tua.

**FOFOGA FETALAI:** Ou te vaelupeina le saunoaga a le sui usufono mamalu, ona o lea ua tatou taunuu i le tatou taimi malolo, ou te faamalulu atu ai, o le a mafai ona toe faaauau lau saunoaga pe a tatou tauaofia i le itula e 6:00 i le afiafi.

Ou te faasilasila atu ua faataatiaese nei Taulumaga o le Fono Aoao  
Faitulafono seia aulia le itula e 6:00 i le afiafi a nanei.

*Na faataatiaese Taulumaga a le Fono Aoao Faitulafono i le itula e  
12:56 i le aoauli.*